

四庫全書

子部

欽定四庫全書

子部

薛氏醫案卷十四

詳校官太醫院醫士臣趙正池

編修臣倉聖脈覆勘

總校官原任中允臣王燕緒

校對官助教臣卜維吉

謄錄監生臣謝蓮謬

欽定四庫全書

薛氏醫案卷十四

明薛己撰

外科樞要二

腦疽

腦疽屬膀胱經積熱或濕毒上湧或陰虛火熾或腎水虧損陰精消涸初起腫赤痛甚煩渴飲冷脈洪數而有  
力乃濕熱上湧當用黃連消毒散并隔蒜灸以除濕熱

漫腫微痛渴不飲冷脉洪數而無力乃陰虛火熾當用  
六味丸及補中益氣湯以滋化源若口舌乾燥小便頻  
數或淋漓作痛乃腎水虧損急用加減八味丸及前湯  
以固根本引火歸經若不成膿不腐潰陽氣虛也四君  
加歸芪不生肌不收斂脾氣虛也十全大補湯若色黯  
不潰或潰而不斂乃陰精消涸名曰腦燥為不治若攻  
補得宜亦有可愈治者審焉

治驗

一婦人患前症口乾舌燥內服清熱外敷寒涼色黯不  
覺胸中氣噎此內真寒而外假熱也彼疑素有痰火不  
欲溫補余以參芪各五錢薑桂各三錢一劑頓然潰又  
用大補藥而愈

一婦人冬間患此腫痛熱渴余用清熱消毒藥潰之而  
愈次年三月其舌腫大遍身發疔如葡萄不計其數手  
足尤多乃脾胃受毒也先各刺出黑血隨服奪命丹七  
粒出臭汗瘡熱益甚便秘二日與大黃芩連各三錢升

麻白芷山梔薄荷連翹各二錢生甘草一錢水煎三五  
沸服之大小便出臭血甚多下體稍退乃磨入犀角汁  
再服舌本及齒縫出臭血諸毒乃消更以犀角地黃湯  
而愈

耳瘡

耳瘡屬手少陽三焦經或足厥陰肝經血虛風熱或肝  
經燥火風熱或腎經虛火等因若發熱焮痛屬少陽厥  
陰風熱用柴胡梔子散若內熱痒痛屬前二經血虛用

當歸川芎散若寒熱作痛屬肝經風熱用小柴胡湯加  
山梔川芎若內熱口乾屬腎經虛火用加味地黃丸如  
不應用加減八味丸餘當隨症治之

治驗

文選姚海山耳根赤腫寒熱作痛此屬三焦風熱也但  
中氣素虛以補中益氣加山梔炒黃芩牛蒡子治之而  
愈

一儒者因怒耳內作痛出水或用祛風之劑筋攣作痛

肢體如束此肝火傷血也用六味九料數服而愈

舉人毛石峯子年二十耳內出水或作痛年餘矣脉洪數左尺益甚此屬肝腎二經虛熱也用加減八味九料一劑而愈

一男子每入房耳內或作痒或出水常以銀簪探入甚喜陰涼此屬腎經虛熱也用加減八味九而愈

一婦人因怒發熱每經行即兩耳出膿兩太陽作痛以手按之痛稍止怒則胸脇乳房脹痛或寒熱往來或小



便頻數或小腹脹悶此皆屬肝火血虛也先用梔子清肝散二劑又用加味道遙散數劑諸症悉退又以補中益氣加五味而全愈

一婦人經行後因怒氣勞役發熱寒熱耳內作痛余以經行為血虛用八珍湯加柴胡怒氣為肝火用加味道遙散勞役為氣傷用補中益氣湯加山梔而愈

一婦人耳內作痛或腫聾寒熱發熱面色素青黃經行則變赤余以為怒氣傷肝鬱結傷脾用加味歸脾湯加

味道遙散而愈

一婦人耳內腫痛寒熱口苦耳內出水焮連頸項飲食少思此肝火盛而傷脾也用小柴胡湯加山梔牡丹皮調補肝脾而全愈

一孀婦或耳內外作痛或項側結核內熱晡熱月經不調唾痰少食胸膈不利余以為鬱怒傷肝脾朝用歸脾湯以解脾鬱生脾氣夕用加味道遙散以清肝火生肝血而愈

太卿魏莊渠癸卯仲冬耳內作痛左尺洪大而澁余曰  
此腎水枯竭不能生肝木當滋化源彼不信仍雜用直  
補之劑余謂其壅陸時若曰莊渠不能生腎水來春必  
不能起至明年季春十八日復請治昏憤不語頤耳之  
分已有膿矣且卵縮便數方信余言求治辭不克用六  
味丸料一鍾陰莖舒出小便十減六七神思頓醒余曰  
若砭膿出庶延數日為立嗣之計否則膿從耳出死立  
待矣或謂不砭可生者余因辭歸翌日果耳內出膿至

二十一日巳未火日而卒

憲副姜時川癸卯冬右手寸口浮數而有痰口內若有  
瘡然余曰此胃火傳於肺也當薄滋味慎起居以禦之  
甲辰秋尺脉洪數而無力余曰此肺金不能生腎水無  
根之火上炎也宜靜調理滋化源以治之彼云今喉耳  
不時燥痛肢體不時發熱果是無根之火殞無疑矣後  
會劉古峽云姜公之病已如尊料遂拉同往視喉果瘡  
潰脉愈洪大又誤以為瘡毒而投苦寒之劑卒于仲春

二十八日乃藥之促其亡也否則尚能延至仲夏

鬚疽 男婦同用

鬚疽屬肝胆二經怒火或風熱血虛所致若發熱作渴者用柴胡清肝散腫譽痛甚者用仙方活命飲若大勢已退餘毒未散用參芪歸朮為主佐以川芎白芷金銀花以速其膿膿成仍用參芪之類托而潰之若欲其生肌收斂脾虛者六味丸血虛者四物加參芪或血燥或水而不能生木者用四物湯六味地黃丸氣虛者用補

中益氣湯皆當滋其化源為善

治驗

侍御朱南臯患前症腫痛發熱日晡尤甚此肝胆二經血虛火燥也用四物湯加玄參柴胡桔梗炙草治之而愈又因勞役發熱畏寒作渴自汗用補中益氣湯去柴升加五味麥門炮薑而瘥

州守胡廷器年七十患前症腫焮作痛頭目俱脹此腎水不足肝胆火盛而血燥也用六味丸料四劑瘡頭出

水而愈後因調養失宜仍瘡痛煩熱喘渴脉洪大而虛  
此脾胃之氣傷也用補中益氣以補脾胃用六味地黃  
丸以補腎肝而痊

瘰癧

婦人症見婦人良方  
小兒症見小兒撮要

夫瘰癧之症屬三焦肝胆二經怒火風熱血燥或肝腎  
二經精血虧損虛火內動或恚怒氣逆憂思過甚風熱  
邪氣內搏於肝益怒傷肝肝主筋肝受病則筋累累然  
如貫珠也其候多生於耳前後項腋間結聚成核初覺

憎寒惡熱咽項強痛苦寒熱焮痛者此肝火風熱而氣病也用小柴胡湯以清肝火并服加味四物湯以養肝血若寒熱既止而核不消散者此肝經火燥而血病也用加味逍遙散以清肝火六味地黄丸以生腎水若腫高而稍軟面色痿黃皮膚壯熱膿已成也可用針以決之及服托裏之劑若經久不愈或愈而復發膿水淋漓肌膚羸瘦者必純補之劑庶可收斂否則變成九癰內經曰陷脈為癰留連肉腠即此病也外用豆豉餅琥珀



膏以驅散寒邪補接陽氣內服補中益氣湯六味九以  
滋腎水培肝木健脾土亦有可愈者大抵肝膽部分結  
核不問大小其脉左關弦緊左尺洪數者乃腎水不能  
生肝木以致膽火燥而筋攣須用前藥以滋化源是治  
其本也外臺秘要云肝腎虛熱則生癰病機云癰瘰不  
係膏梁丹毒火熱之變因虛勞氣鬱所致止宜補形氣  
調經脉其瘡自消散蓋不待汗之下之而已也其不詳  
脈證經絡受病之異者下之則犯經禁病禁虛虛之禍

如指諸掌若脉洪大元氣虛敗為不治若面晄白為金  
尅木亦不治若眼內赤脉貫瞳人見幾條則幾年死使  
不從本而治妄用伐肝之劑則誤矣蓋伐肝則脾土先  
傷脾傷則損五臟之源矣可不慎哉

治驗

閻老楊石齋子年十七發熱作渴日晡頰赤左關尺脉  
大而浮此肝腎陰虛用補陰八珍湯五十餘劑又加參  
芪二十餘劑而潰但膿水清稀肌肉不生乃以參芪歸

朮為主佐以芍藥熟地麥門五味膿水稠而肌肉生更服必效散一劑癰毒去而瘡口斂

容臺張美之善怒孟春患此或用伐肝之劑不愈余以為肝血不足用六味地黄丸補中益氣湯以滋化源至季冬而愈

一儒者愈後體瘦發熱晝夜無定此足三陰氣血俱虛用八珍加麥門五味二十餘劑又用補中益氣加麥門五味及六味丸而愈

儒者楊澤之缺盆間結一核余謂此肝火血燥而筋攣法當滋腎水生肝血彼反用行氣化痰外敷南星商陸益大如碗余用補中益氣湯六味地黃丸以滋腎水間用蘆薈丸以清肝火年餘元氣復而消

儒者張子容素善怒患此久而不愈瘡出鮮血左關弦洪重按如無此肝火動而血妄行症屬氣血俱虛用補中益氣湯以補脾肺用六味丸以滋腎肝而愈

一男子頸間結核大潰一婦人左眉及髮際結核並用

梔子清肝散海藻散堅丸以清肝火養肝血益元氣而愈此症亦有大如升斗者亦治以前藥可愈

陸子溫兩耳下腫硬用伐肝軟堅之劑益甚其脉左關弦緊左尺洪數此腎水虧損而筋攣也當生肺金滋腎水則肝得血而筋自舒矣彼不悟仍服前藥竟致不起

### 時毒

夫時毒者為四時邪毒之氣而感之於人也其候發於鼻而耳項咽喉赤腫無頭或結核有根寒熱頭痛恍惚

不寧狀如傷寒五七日之間亦能殺人治宜精辨之若  
脉浮數者邪在表也用葛根牛蒡子湯解毒升麻湯之  
類以發之脉沉瀋者邪在裏也用梔子仁湯大黃湯之  
類以下之表裏俱病者犀角升麻湯甚者砭出惡血并  
用通氣散嚙鼻內取嚏以泄其毒十日外自消若嚙藥  
不嚏者不可治之如嚏出膿血者治之必愈至七八日  
之間大小便通利頭面腫起高赤者可服托裏散黃芪  
散此病若五日已前精神昏亂咽喉秘塞語聲不出頭

面赤腫食不知味者必死之候凶荒勞役患之安裏為主用普濟消毒飲最善然而此症有陰有陽有可汗有可下若誤認為熱毒而用寒藥則謬矣

### 治驗

少宰李蒲汀用發散之藥耗損元氣患處不消體倦惡寒食少口乾余用益氣湯加桔梗及托裏消毒散而愈秋官陳同野元氣素弱脉微細而伏此形病俱虛也用參朮芎歸陳皮柴胡升麻炙草以升舉陽氣用牛蒡玄

參連翹桔梗以解熱毒二劑瘰癧頓消而脉亦復矣苟以脉微細為屬陰以瘰癧赤為屬陽而藥之鮮有不誤者

一婦人潰後瘰癧赤不消食少體倦膿清色白乃脾肺氣虛也先用六君加桔梗芎歸後用益氣湯加桔梗而斂春官表谷虛之妹表散過度瘰癧硬不食脉浮大按之而短此真氣絕也辭不治後果歿

疔瘰

疔瘰屬足陽明胃經或外因風熱所乘或內因積熱所



致若瘡痛寒熱者白芷胃風湯內熱瘡痛者升麻黃連  
湯外瘡作痛內熱口乾者犀角升麻湯內傷寒涼不能  
消潰者補中益氣湯發熱作渴大便秘結者加味清涼  
飲表裏俱解而仍腫痛者欲作膿也托裏散若飲食少  
思胃氣虛弱也六君子湯肢體倦怠陽氣虛弱也補中  
益氣湯膿毒既潰瘡痛不減熱毒未解也托裏消毒散  
膿出而反痛氣血虛也人參內托散發熱晡熱陰血虛  
也八珍湯惡寒發熱氣血俱虛也十全大補湯若瘡嫩

痛連耳下者屬手足少陽經當清肝火若連頤及耳後者屬足少陰經虛火當補腎水患此而有不治者多泥風熱執用尅伐之藥耳

治驗

地官陳用之服發散之劑寒熱已退腫痛不消此血凝滯而欲作膿也用托裏消毒散而膿成又用托裏散而膿潰但膿清作渴乃氣血虛也用八珍加麥門五味三十餘劑而愈

上舍盧懋樹左尺脉數症屬腎經不足誤服消毒毒之劑致損元氣而不能愈余用補中益氣六味丸料而痊

上舍熊棟卿頤後患之膿清體瘦遺精盜汗晡熱口渴痰氣上湧久而不愈脉洪大按之微細屬腎氣虧損所致遂用加減八味丸料并十全大補湯而愈

一婦人素內熱因怒耳下至頸腫痛寒熱此肝膽經火燥而血虛用柴胡梔子散而腫痛消用加味逍遙散而寒熱退用八珍湯加丹皮而內熱止

發背 男婦同用

發背屬膀胱督脉經或陰虛火盛或醇酒厚味或鬱怒房勞所致若腫赤痛甚脉洪數而有力熱毒之症也為易治漫腫微痛色黯作渴脉洪數而無力陰虛之症也為難治不腫不痛或漫腫色黯脈微細陽氣虛甚也尤為難治若腫焮作痛寒熱作渴飲食如常此形氣病氣俱有餘也先用仙方活命飲後用托裏消毒散解之漫腫微痛或色不赤飲食少思此形氣病氣俱不足也用

托裏散調補之不作膿或膿成不潰陽氣虛也托裏散  
倍加肉桂參芪膿出而反痛或膿清稀氣血俱虛也八  
珍湯惡寒形寒或不收斂陽氣虛也十全大補湯晡熱  
內熱或不收斂陰血虛也四物加參朮作嘔欲嘔或不  
收斂胃氣虛也六君加炮姜食少體倦或不收斂脾氣  
虛也補中益氣湯加茯苓半夏肉赤而不斂血熱也四  
物加山梔連翹肉白而不斂脾虛也四君加酒炒芍藥  
木香小便頻數者腎陰虧損也加減八味丸若初患未

發出而寒熱疼痛作渴飲冷此邪氣內蘊也仙方活命  
飲口乾飲熱漫腫微痛此元氣內虛也托裏消毒散飲  
食少思肢體倦怠脾胃虛弱也六君子湯如未應加薑  
桂其有死者乃邪氣盛真氣虛而不能發出也在於旬  
餘之間見之若已發出用托裏消毒散不腐潰用托裏  
散如不應急溫補脾胃其有死者乃真氣虛而不能腐  
潰也在於二旬之間見之若已腐潰用托裏散以生肌  
如不應急溫補脾胃其有死者乃脾氣虛而不能收斂

也在於月餘見之此三證雖不見於經籍余嘗治而歷  
驗

治驗

都憲周弘岡背患疽腫而不潰脉大而浮此陽氣虛弱  
而邪氣壅滯也用托裏散倍用參芪反內熱作渴脉洪  
大鼓指此虛火也用前散急加肉桂脉證頓退仍用托  
裏而愈若以為熱毒而用寒藥則誤矣

太僕王的塘初起因大勞又用十宣散之類加喘渴內

熱脉大無力此陽氣自傷不能升舉下陷於陰分而為  
內熱也余以補中益氣加酒炒芍藥麥門冬五味子治  
之而愈

上舍張克恭患此內服外敷皆寒涼敗毒遍身作痛欲  
嘔少食晡熱內熱惡寒畏寒余曰遍身作痛榮衛虛而  
不能營於肉裏也欲嘔少食脾胃虛寒而不能消化飲  
食也內熱晡熱陰血內虛而陽氣陷於陰分也惡寒畏  
寒陽氣虛弱而不能衛於肌膚也此皆由脾胃之氣不



足所致遂用補中益氣湯諸症漸退更以十全大補湯  
腐肉漸潰又用六君子湯加芎歸肌肉頓生而愈

府庠彭碧溪患腰疽服寒涼敗毒之藥色黯不痛瘡頭  
如鋪黍背重不能安寢耳曠目白面色無神小便頻澀  
作渴迷悶氣粗短促脉浮數重按如無余先用滋腎水  
之藥一劑少頃便利渴止背即輕爽乃砭去瘀血以艾  
半觔許明灸患處外敷烏金膏內服參芪歸朮肉桂等  
藥至數劑元氣稍復自疑肉桂辛熱一日不用手足並

冷大便不禁仍加肉桂及補骨脂二錢肉豆蔻一錢大便如常其肉漸潰更用當歸膏以生肌肉八珍湯以補氣血而愈

儒者周兩峯懷抱久鬱背脊患疽肝脉弦洪脾脉浮大按之微細以補中益氣湯加桔梗貝母少用金銀花白芷二劑肝脉頓退脾脉頓復乃以活命飲二劑膿潰腫消肝脉仍弦此毒雖去而胃氣復傷仍用補中益氣湯加茯苓半夏而愈

上舍蔡東之患此余用托裏之藥而潰瘡口尚未全斂時值仲冬兼咳嗽余曰瘡口未斂脾氣虛也咳嗽不止肺氣虛也法當補其母一日與其同宴見有羊肉余曰補可以去弱人參羊肉之類是也最宜食之遂每日不徹旬餘而瘡斂嗽亦頓愈矣

憲副屠九峯孟春患此色黯漫腫作渴便數尺脉洪數此腎水乾涸當歿於火旺之際不信更用苦寒之藥復傷元氣以促其歿

京兆柴黼菴仲夏患之色黯微腫發熱煩躁痰涎自出  
小腹陰實手足逆冷右關脉澁兩尺微細余曰此陰虛  
之症也王太僕云大熱而不熱是無火也決不能起懇  
求治之用大溫補之藥一劑流涎雖止患處不起終不  
能救

舉人顧東溪久作渴六月初腰患疽不慎起居瘡潰尺  
許色黯敗臭小便如淋唇裂舌刺七月終請治右尺洪  
數左關浮濇余謂先渴而患疽者乃腎水乾涸虛火上

炎多致不起然膿水敗臭色黯不痛瘡口張大乃脾氣  
敗而肌肉死也小便如淋痰壅喘促口乾舌裂乃脾肺  
敗而腎水絕也左尺洪數腎無所生也左關浮瀦肺尅  
肝也況當金旺之際危殆速矣二日後果歿蓋此症既  
發於外兩月方歿者乃元氣虛不能收斂也若豫為調  
補使氣血無虧亦有得生者

乳癰乳岩結核

婦人症見婦人  
良方女科撮要

乳房屬足陽明胃經乳頭屬足厥陰肝經男子房勞恚

怒傷於肝腎婦人胎產憂鬱損於肝脾若焮痛寒熱當發散表邪瘡焮痛甚當清肝消毒並宜隔蒜灸不作膿或膿成不潰托裏散為主不收斂或膿清稀補脾胃為主若膿出反痛或作寒熱氣血虛也十全大補湯體倦口乾中氣虛也補中益氣湯晡熱內熱陰血虛也八珍湯加五味子欲嘔作嘔胃氣虛也香砂六君子湯食少作嘔胃氣虛寒也前湯加藿香食少泄瀉脾氣虛寒也前湯加炮薑若勞碌腫痛氣血未復也八珍湯倍用參

苓歸朮若怒氣腫痛肝火傷血也八珍湯加柴胡山梔  
若肝火血虛而結核者四物湯加參朮柴胡升麻若肝  
脾氣血虛而結核者四君子加芎歸柴胡升麻鬱結傷  
脾而結核者歸脾湯無瓜蒌散若鬱怒傷肝脾而結核  
不痒不痛者名曰乳岩最難治療苟能戒七情遠厚味  
解鬱結養氣血亦可保全

治驗

封君袁陽涇左乳內結一核月餘赤腫此足三陰虛兼

怒氣所致用八珍湯加柴梔丹皮治之諸證漸退又用清肝解鬱湯而愈時當仲秋兩目連劄肝脉微弦此肝經火盛而風動也更加龍膽草五味并六味地黄丸而愈若用清熱敗毒化痰行氣鮮有不誤者

一儒者兩乳患癰服連翹飲反堅硬食少內熱胸脇作痛日晡頭痛小便赤澀此足三陰虛而兼鬱怒前藥復損脾肺先用六君加芎歸柴胡山梔四十餘劑元氣復而自潰乃作痛惡寒此氣血虛也用十全大補湯六味



丸而愈

一儒者兩乳作痛兩脇作脹久服流氣飲瓜蒌散後左  
脇下結一塊肉色不變勞則寒熱用八珍加柴胡遠志  
貝母桔梗月餘色赤作痛膿將成矣後針出膿碗許頓  
然作嘔此胃氣虛而有痰也令時嚼生薑服六君子湯  
嘔止加肉桂而瘡愈後出任每勞怒胸乳仍痛或發寒  
熱服補中益氣湯加炒山梔即愈

疔瘡

內經曰膏粱之變足生大疔多由膏粱厚味之所致或因卒中飲食之毒或感四時不正之氣或感蛇蟲之毒或感死畜之穢各宜審而治之其毒多生於頭面四肢形色不一或如小瘡或如水泡或疼痛或麻木或寒熱作痛或嘔吐惡心或肢體拘急並用隔蒜灸并服解毒之劑若不省人事或牙關緊急者以奪命丹為末葱酒調灌之若生兩足者多有紅絲至臍生兩手者多有紅絲至心生唇面口內者多有紅絲入喉皆急用針挑破

其絲使出惡血以泄其毒若患於偏僻之處藥所難導者惟灸法大有回生之功然疔之名狀雖有十三種之不同而治法但審其元氣虛實邪之表裏而庶無悞人於天札也若專泥於疏利表散非惟無益而反害之凡人暴死多是疔毒急取燈遍照其身若是小瘡即是其毒宜急灸之并服奪命丹等藥亦有復甦者

治驗

長洲庠蘇子忠鼻梁患之症屬表邪但氣血俱虛不勝

發散遂用補中益氣為主佐以防風白芷而愈

一男子小指患之或為針刺出血敷以涼藥掌指皆腫三四倍色黯神昏此邪氣鬱遏余先以奪命丹一服活命飲二劑稍可余因他往或為遍刺其手出鮮血碗許臂腫如瓠指大數倍用大劑參芪歸朮之類及頻灸遍身而腫消但大便不實時常泄氣此元氣下陷以補中益氣加骨脂肉蔻吳茱五味又日以人參五錢麥門三錢五味二錢水煎代茶飲又用大補藥五十餘貼而愈

設此症初不用解毒之劑後不用大補之藥死無疑矣  
白蓮涇陳伯和子唇患之有紫脉延至口內將及於喉  
余曰紫脉過喉則難治矣須針其脉并瘡頭出惡血以  
泄其毒則可彼不信別用解毒之劑遂至頭面俱腫復  
求治口內腫脹針不能入乃砭面唇出黑血碗許勢雖  
少退終至不起惜哉

肺疽肺痿

婦人症見  
婦人良方

夫肺者五臟之華蓋也處於胃中主於氣候於皮毛勞

傷氣血腠理不密外邪所乘內感於肺或入房過度腎水虧損虛火上炎或醇酒炙燂辛辣厚味薰蒸於肺或咳唾痰涎汗下過度重亡津液之所致也其候惡風咳嗽鼻塞項強胸脇脹滿呼吸不利咽燥作渴甚則四肢微腫咳唾膿血若吐痰臭濁膿血腥穢胸中隱隱微痛右手寸口脉數而實者為肺疽若吐涎沫而無膿脉數而虛者為肺痿也若咳嗽喘急者小青龍湯咳嗽胸脹者葶藶大棗瀉肺湯咳膿腥濁者桔梗湯咳喘短氣或

小便短少者佐以參芪補肺湯體倦食少者佐以參朮  
補脾湯咳吐痰壅者腎虛水泛也六味地黃丸口乾咽  
燥者虛火上炎也加減八味丸此症皆因脾土虧損不  
能生肺金肺金不能生腎水故始萌則可救膿成則多  
死若脉微緊而數者未有膿也緊甚而數者已有膿也  
內經曰血熱則肉敗榮衛不行必將為膿大凡肺瘡咳  
吐膿血久久如粳米粥者難治若吐膿而不止者亦不  
可治也其吐膿而自止者自愈其脉短而滿者自痊面

色當白而反赤者此火之尅金皆不可治苟能補脾肺  
滋腎水庶有生者但恐專攻其瘡脾胃益虛鮮有不誤  
者矣

治驗

一儒者患肺癰鼻流清涕咳吐膿血胸膈作脹此風邪  
外傷也先用消風散加亂髮灰二服而鼻利又用四君  
加芎歸及桔梗湯而愈後因勞役咳嗽吐膿小便滴瀝  
面色黃白此脾土不能生肺金肺金不能生腎水也用



補中益氣湯六味地黄丸而愈

一儒者因素善飲咳膿項強皮膚不澤此脾肺氣虛外邪所乘而成肺癰也先用桔梗湯後用人參補肺湯而痊

一男子咳吐痰膿胸腹膨脹兩寸與右關脉皆洪數此火不能生土而土不能生金也用桔梗湯為主佐以補中益氣湯而愈

一男子不時咳嗽作渴自汗發熱便數自用清肺降火

理氣滲利之劑服之反小便不通面目赤色唇裂痰壅  
脾肺腎三脉浮大按之而數此足三陰虧損不能相生  
當滋化源否則成癱矣不信仍用分利之藥後果患肺  
癱余用桔梗湯及六味丸而愈

一男子面赤吐膿發熱作渴煩燥引飲脉洪數而無倫  
次先用加減八味丸加麥門大劑一服熱渴頓止即熟  
睡良久覺而神爽索食再劑諸症頓減仍用前藥更以  
人參五錢麥門二錢五分五味二錢水煎代茶日飲一

劑月餘而安此症面赤者當補肺腎面白者當補脾肺  
治者驗之

一婦人素血虛發熱咳嗽或用痰火之劑後吐膿血面  
赤脉數其勢甚危此膿成而血氣虛也余用八珍湯以  
補元氣用桔梗湯以治肺症脉症漸愈

一婦人感冒風寒或用發表之劑反咳嗽喘急飲食少  
思胸膈不利大便不通右寸關脉浮數欲用通利之劑  
余曰此因脾土虧損不能生肺金若更利之復耗津液

必患肺癰矣不信仍利之虛證悉至後果吐膿余朝用益氣湯夕用桔梗湯各數劑吐膿漸止又朝仍用前湯夕用十全大補湯各五十餘劑喜其善調理獲愈

一婦人咳嗽吐痰胸膈作痛右寸關浮滑項下牽強此脾胃積熱成痰非癰患也以二陳湯加山梔白朮桔梗治之而痊

一婦人素血虛內熱時咳甲辰孟冬兩尺浮洪余曰當防患肺症丙午孟春果咳嗽左右寸脉洪數此心火刑

尅肺金而成肺癰也膿已成矣夏令可憂余用壯水健脾之劑稍愈彼不慎調攝果歿於仲夏

### 胃脘癰

聖濟總錄云胃脘癰由寒氣隔陽熱聚胃口寒熱不調故血肉腐壞以氣逆於胃故胃脉沉細以陽氣不得上升故人迎熱甚令人寒熱如瘧身皮甲錯或咳嗽或嘔膿吐血若脉洪數膿成也急排之脉遲緊瘀血也急下之否則其毒內攻腐爛腸胃矣丹溪先生云內疽者因

飲食之毒七情之火相鬱而發用射干湯主之愚常以  
蒼朮仁湯牡丹皮散太乙膏選用之亦效若吐膿血飲  
食少思助胃壯氣為主而佐以前法不可專治其瘡

治驗

一男子寒熱作渴不時咳吐血內血腥又五日吐膿身  
皮甲錯用射干湯四劑膿血已止但氣壅痰多以甘桔  
湯而愈

一男子用射干湯之類將愈但氣喘體倦發熱作渴小

便頻數此肺氣不足用補中益氣山藥山茱麥門五味  
時仲夏更以生脉散代茶飲而愈

一婦人素食厚味吐膿已愈但小便淋瀝此肝腎氣虛  
用補中益氣加麥門五味及加減八味丸而愈若膏粱  
之人初起宜用清胃散

### 腸癰

孫真人云腸癰為病小腹重強按之則痛小便如淋時  
時汗出復惡寒身皮甲錯腹皮急如癰甚者腹脹大轉

側有水聲或繞臍生瘡或膿從臍出或從大便下蓋因七情飲食所致治法脉遲緊者未有膿也用大黃湯下之脉洪數者已有膿也用薏苡仁湯排之小腹疼痛小便不利膿壅滯也牡丹皮散主之若大便或臍間出膿者不治內經云腸癰為病不可驚驚則腸斷而死故患是者其坐卧轉側理宜徐緩時少飲薄粥及服八珍湯固其元氣靜養調理庶可保全其生

治驗



通府張廷用患之兩月餘矣時出白膿體倦惡寒此邪  
氣去而中氣虛也余用托裏散無益氣湯徐徐呷之又  
令以猪肚肺煮爛取其湯調米粉煮時呷半盞後漸調  
理而痊

一男子裏急後重下膿脹痛此脾氣下陷用排膿散蠟  
礬丸而愈後因勞役寒熱體倦用補中益氣湯而安

一婦人小腹脹痛小便如淋時時汗出此瘀血凝結於  
內先以神效瓜蒌散二劑少愈更以薏苡仁湯而愈

一婦人小腹脹痛而有塊脉孔而澀此瘀血為患也以  
四物加玄胡索紅花桃仁牛膝木香二劑血下而痊  
一婦人小腹脹痛大便秘瀉轉側有水聲脉洪數此膿  
瘀內潰也以梅仁湯一劑下瘀血諸症悉退再以蒼朮  
仁湯二劑而痊

一婦人膿成脹痛小便不利脉洪數此膿毒內潰也服  
太乙膏三錢膿下甚多更以瓜萼散蠟礬丸及托裏散

而安

如用雲母膏尤妙

一婦人產後惡血不止小腹作痛服瓜子仁湯下瘀血而痊凡瘀血停滯宜急治之緩則腐化為膿最為難治若流注關節則為敗症

腹癰

男婦同用

腹癰謂瘡生於肚腹或生於皮裏膜外屬膏染厚味七情鬱火若漫腫堅硬肉色不變或脉遲緊未成膿也四君加芎歸白芷枳殼或托裏散腫軟色赤或脉洪數已成膿也托裏消毒散膿成而不外潰者氣血虛也卧針

而刺之腫焮作痛者邪氣實也先用仙方活命飲隔蒜  
灸以殺其毒後用托裏以補其氣若初起欲其內消當  
助胃壯氣使根本堅固而以行經活血之藥佐之若用  
尅伐之劑欲其消散則腫者不能潰潰者不能斂若用  
疎利之藥下其膿則少壯者多為難治老弱者立見危  
亡亦有食積疝氣類此者見保嬰撮要

治驗

司馬李梧山患此腹痛而勢已成用活命飲一劑痛頓

止用托裏消毒散腫頓起此膿將成也用托裏散補之  
自潰而愈

錦衣掌堂劉廷器正德辛未仲夏腹患癰潰而膿清熱  
渴腹脹作嘔不食或以為熱毒內攻皆用芩連大黃之  
劑病愈甚余曰當捨時從症投以參芪姜附等藥一劑  
嘔止食進再用托裏等劑而瘡愈

進士邊雲莊腹痛惡寒脉浮數余曰浮數之脉而反惡  
寒瘡疽之症也不信數日後復請視之左尺洪數余曰

內有膿矣仍不信至小腹痛脹連及兩臂始悟余曰膿  
潰臂矣氣血俱虛何以收斂急服活命飲一鍾臂潰一  
孔出膿斗許氣息奄奄用大補藥一劑神思方醒每去  
後糞從瘡出痛不可當小腹間如有物上挺即發瘰不  
省人事煩躁脉大舉按皆實省而診之脉洪大按之如  
無用十全大補倍用參芪至四斤更加附子二枚煎膏  
服而瘰止又用十全大補湯五十餘劑而瘡斂

上舍周一元腹患癰三月不愈膿水清稀朝寒暮熱服

四物黃蘗知母之類食少作瀉痰涎上湧服二陳枳實  
之類痰涎愈甚胸膈痞悶謂余曰何也余曰朝寒暮熱  
血氣虛也食少作瀉脾腎虛也痰湧胸痞脾肺虛也悉  
因真氣虛而邪氣實也當先壯其胃氣使諸臟有所稟  
而邪自退矣遂用六君加黃芪當歸數劑諸症漸退又  
用十全大補湯肌肉漸斂更用補中益氣湯調理而痊  
上舍毛體仁素陰虛春初咳嗽胸中隱痛腎脉數而無  
力肺脉數而時見此腎氣虧損陰火熾盛用六味九料

一劑服之病勢雖減內癰已成蓋因元氣虛而未能發出火令可畏不信服痰火之劑兩月後乳間微腫脉洪數而無力余曰膿內潰矣當刺出其膿以免內攻之禍不信又月餘請治但針得一孔膿攪不利仍復內攻唇舌青赤余曰臟腑已壞吾何能治之後果歿

從侄孫年十四而畢姻乙巳春年二十四腹中作痛用大黃等藥二劑下血甚多胸腹脹滿痰喘發熱又服破氣降火藥一劑汗出如水手足如冰余他往適歸診之



左關洪數右尺尤甚乃腹癱也雖能收斂至夏必變而成瘵疽用參芪各一兩歸朮各五錢陳皮茯苓各三錢炙草炮薑各一錢二劑諸症少退腹始微赤按之覺痛又二劑作痛又二劑瘰癧痛脉滑數針出膿瘵更用大補湯精神飲食如故因遺精患處色黯用前藥加五味山茱山藥骨脂吳茱萸等劑瘡口漸斂瘵症悉具其脉非洪大而數即微細如無惟專服獨參湯人乳汁少復良久仍脫余曰當備後事以俟火旺乃禱鬼神巫者歷言往

事如見更示以方藥皆峻利之劑且言保其必生敬信服之後果歿經曰拘於鬼神者不可與言至德而况又輕信方藥於邪妄之人耶書此以警後患

流注

婦人症見婦人良方女科撮要小兒症見小兒撮要

流注或因飲食勞倦脾胃傷損或因房勞陰虛陽氣湊襲或因營氣不從逆於肉理或因腠理不密外邪客之或暴怒傷肝或鬱結傷脾或濕痰流注或跌撲血滯或產後惡露皆因氣虛血注而凝也或生於四肢關節或

生於胸腹腰臀或結塊或漫腫或作痛皆由元氣虧損所致也悉宜葱熨及用益氣養榮湯固其元氣則未成者自消已成者自潰若久而不斂佐以豆豉餅琥珀膏祛散寒邪補接陽氣若內有膿管而不斂者用針頭散腐化之經云形傷痛氣傷腫又曰真氣奪則虛邪氣勝則實若不補氣血節飲食慎起居戒七情而專用寒涼剋伐其不死者幸矣

治驗

侍御朱東溪左脇下近腹肝胆經部分結一塊四寸許  
漫腫不赤按之則痛余曰此當補脾胃彼謂瘡瘍宜表  
散乃服流氣飲後胃氣頓虛始信余言遂用四君子加  
芎歸酒炒芍藥薑桂胃氣復而惡症退乃去乾薑加黃  
芪數劑微赤微痛又三十餘劑焮腫大痛此膿內潰也  
遂針之用補中益氣加減八味丸而愈

一男子元氣虛弱臀腫硬而色不變飲食少思如此年  
餘矣此氣血虛而未能潰也先用六君子湯加川芎當

歸芍藥元氣漸復飲食漸進患處漸潰更加黃芪肉桂  
并用葱熨之法月餘俟膿熟而針之又以十全大補湯  
及附子餅熨之而愈

一男子腿患瘡肉色不變亦不作痛此真氣虛也以補  
中益氣加茯苓半夏少佐以枳殼木香外用香附餅熨  
之彼謂氣無補法乃服流氣飲胃氣愈虛余用六君子  
加芍歸數劑飲食少進再用補劑月餘而消

一男子脇腫一塊日久不潰按之必痛脉微而澁此形

症俱虛也當補不當瀉乃用人參養榮湯及熱艾熨患處膿成以火針刺之用豆豉餅十全大補湯百劑而愈一男子腹患此瘰硬不潰脉弱時嘔欲用敗毒等藥余謂瘰硬不潰乃陽氣虛弱嘔吐少食乃胃氣虛寒法當溫補脾胃彼不信仍用攻伐而嘔愈甚復請治脉微弱而發熱余曰熱而脉反靜脫血脉反實汗後脉反躁者皆為逆也辭不治後果歿

余北仕時有留都賈學士子年十六患此二載矣公陞

北宗伯邀余治脉洪大而數膿清熱渴食少體倦夜間盜汗午前畏寒余曰真氣不足邪氣有餘治之無功矣余午前以四君子加芎歸炙草午後以四君子加五味麥門參芪兩月諸症遂可一二又有用滲利之劑保其必生者三月後形體骨立復求余治余時被命南下後竟不救

鶴膝風

婦人症見婦人良方  
小兒症見保嬰撮要

鶴膝風乃調攝失宜虧損足三陰經風邪乘虛而入以

致肌肉日瘦內熱減食肢體攣痛久則膝大而腿細如鶴之膝故名之若傷於脾胃者補中益氣湯為主傷於肝腎者六味丸為主若欲其作膿或潰後十全大補湯為主皆佐以大方風湯初起須用葱熨可以內消若津涸口乾中氣不足也補中益氣湯加蔓荊子發熱晡熱陰血虛陽氣不升也補中益氣湯加蔓荊子發熱晡熱陰血虛弱也用四物參芪白朮畏寒憎寒陽氣虛弱也用十全大補湯飲食少思胸膈膨脹脾胃虛痞也用四君子湯



面色痿黃飲食少思脾胃虛弱也用六君湯膿水清稀  
肌肉不生氣血俱虛也用八珍湯熱來復去有時而動  
無根虛火也用十全大補湯形瘦嗜卧寢息發熱痰盛  
作渴小便頻數五臟虛損也用六味九臍腹疼痛夜多  
漩溺脚膝無力頭暈吐痰腎氣冷敗也用八味丸發熱  
大渴不欲近衣面目赤色脉大而虛血虛發躁也用當  
歸補血湯或有利後而患者亦治以前法餘當臨症制

宜

治驗

州守張天澤左膝腫痛胸膈痞滿飲食少思時欲作嘔  
頭暈痰壅日晡益倦此脾肺氣虛用葱熨法及六君加  
炮薑諸症頓退飲食少思用補中益氣加蔓荊子頭目  
清爽間與大防風湯十餘劑又用補中益氣三十餘劑  
而消

通府劉國威先筋攣骨痛右膝漫腫用化痰消毒之劑  
腫痛益甚食少體倦加祛風消毒等藥寒熱作嘔大便

不實用二陳除濕之類腫起色赤內痛如錐余診其脉滑數而無力此膿已成元氣虛而不能潰也用十全大補湯四劑佐以大方風湯一劑而潰又百餘劑而得痊一儒者腿筋弛長月餘兩膝腫痛此陰虛濕熱所乘也用六味丸為主佐以八珍湯加牛膝杜仲間以補中益氣湯三月餘而消

一男子腿痛膝腫脉浮按之弦緊此肝腎虛弱也用大方風湯二劑已退彼惑於附子有毒乃服治瘡之藥日

漸消瘦虛症漸至復求治余曰倦怠消瘦脾胃衰而不能榮運也小便不禁膀胱虛而不能約制也燥熱虛痞胃氣弱而不能化也惚恍健忘精神失而潰亂也惡症蜂集余辭之果後歿

天泡瘡

天泡瘡屬元氣不足邪氣所乘亦有傳染而患受症在肝腎二經故多在下體發起有先筋骨痛而後患者有先患而後痛者初起脉浮數邪在脾肺經也先用荆防

敗毒散解散之脉弦數邪在肝胆經也先用龍膽瀉肝湯清解之脉沉數邪在臟腑也先用內疎黃連湯通導之後用換肌消毒散為主愈後再無筋骨疼痛之患若瘡凸赤作痛熱毒熾盛也瘡微作痛毒將殺也瘡色白而不結痂陽氣虛也色赤而不結痂陰血虛也搔癢脉虛浮氣不能相榮也搔癢脉浮數血不能相榮也臀背間或頸間作癢膀胱陰虛也陰器間或股內痒肝經血虛也陰囊作痒重墜肝經陰虛濕熱也小便頻數短少

色赤肝經陰虛也小便頻數色白短少脾肺氣虛也面  
目搔痒或搔變赤外邪相搏也眉間痒或毛落肝胆血  
燥也飲食少思口乾飲湯胃氣虛也飲食難化大便不  
實脾氣虛也侵晨或夜間泄瀉脾腎虛也若治失其法  
有蝕傷眼目腐爛玉莖拳攣肢體者但用九味蘆薈丸  
以清肝火六味丸以生腎水蠲痺解毒散以養血祛邪  
亦有可愈者若誤用輕粉等劑反為難治

治驗

一儒者患前症先玉莖作痒出水後陰囊股內小腹脇  
臂發小癩或乾膿窠誤服祛風等藥肢體倦怠惡寒發  
熱飲食漸減大便不實左尺洪數左關弦數右關浮緩  
按之微弦余曰此患屬肝胆經也左關脉弦左尺脉浮  
數者腎水少而虛熱傳於肝也右關脉浮緩脾胃之氣  
弱也按之而弦者肝木乘脾土也用六味地黃丸補中  
益氣湯為主佐以換肌消毒散而愈

一儒者患前症色焮赤作痛大便秘而不實服祛風敗

毒等藥舌痛口乾脉浮而數此邪氣去而陰虛所致用  
六味丸料加山梔當歸四劑脉症頓退又用八珍湯加  
山梔丹皮瘡色漸白後用四君加歸芪而愈

一患者服攻毒等藥患處凸而色赤作痛肢體倦怠惡  
寒發熱脉浮而虛此元氣復傷而邪氣實也用補中益  
氣湯二劑而痊

一儒者患之誤服祛風消毒之藥復傷元氣因勞役過  
度內熱口乾齒齦作痛右關脉洪數而虛此脾胃受傷



而火動用清胃散之類而愈

進士劉華甫患之數月用輕粉硃砂等藥頭面背臂各  
結一塊二寸許潰而形氣消弱寒熱口乾舌燥脣裂小  
便淋漓痰涎上湧飲食少思此脾胃傷諸臟弱而虛火  
動也先用六君子二十餘劑又用補中益氣湯加山茱  
山藥麥門五味服之胃氣復而諸症愈惟小便未清痰  
涎未止用加減八味丸而痊

一儒者患之頭面搔痒或成粒或成片或出水脾肺脉

俱洪數此風邪所傷先用荆防敗毒散加萆薢鈎藤鈎  
數劑漸愈但口乾內熱用四物加山梔鈎藤金銀花甘  
草節而愈后遍身搔痒內熱口乾治以六味丸而瘥

一士人每勞役飲酒後則遍身生瘡服祛風敗毒散而  
面目胸背臂脇結一塊如桃栗凹凸痒痛膿水淋漓氣  
血虛甚寒熱往來作渴痰壅此濕熱壅盛元氣虛而不  
能愈也外敷當歸膏內服補陰八珍加萆薢五錢并換  
肌消毒散加乾葛鈎藤鈎各一錢二十餘劑諸症漸退

仍以前藥為主佐以調理之劑兩月餘血氣復而瘡愈

### 赤白遊風

赤白遊風屬脾肺氣虛腠理不密風熱相搏或寒閉腠  
理內熱拂鬱或陰虛火動外邪所乘或肝火風熱血熱  
治法若風熱用小柴胡湯加防風連翹血熱用四物加  
柴胡山梔丹皮風熱相搏用荆防敗毒散內熱外寒用  
加味羌活散胃氣虛弱用補中益氣湯加羌活防風及  
消風散血虛用加味逍遙散陰虛逍遙散六味丸若肝

腎虛熱用六味丸則火自息風自定痒自止若用祛風  
辛熱之劑則肝火愈燥風火愈熾元氣愈虛腠理不閉  
風客內淫腎氣受傷相火翕合血隨火化反為難治矣

治驗

一男子秋間發疣瘡此元氣虛而外邪所侵也先用九  
味羌活湯二劑又用補中益氣加羌防而愈後不慎起  
居盜汗晡熱口乾吐痰體倦懶言用補中益氣湯加減  
八味丸而愈

一婦人身如丹毒搔破膿水淋漓熱渴頭暈日晡益甚  
用加味道遙散而愈

一婦人患赤白遊風晡熱痒甚余用清肝養血之劑不  
信乃服大麻風藥臂痛而筋攣又服化痰順氣之劑四  
肢痿弱而歿

一婦人患前症數用風藥煎湯泡洗以致腹脹而歿

一女子赤暈如霞作痒發熱用加味小柴胡湯加生地連  
翹丹皮而愈

疥瘡

疥瘡屬脾經濕毒積熱或肝經血熱風熱或腎經陰虛發熱其體倦食少為脾經濕熱用補中益氣湯飲冷作痛為脾經積熱用清熱消毒散搔痒發熱為脾虛風熱用人參消風散搔痒作痛為風熱用當歸飲子便秘作痛為熱毒用升麻和氣飲熱渴便利為脾肺虛熱用竹葉黃芪湯內熱晡熱或時寒熱屬肝經血虛風熱用加味道遙散六味丸體倦少食或盜汗少寢為脾氣鬱結

用加味歸脾湯道遥散地黄丸若發熱盜汗或吐痰口  
乾者為腎經虛熱用六味丸料煎服

治驗

稽勳李龍岡遍身患此腿足為甚日晡益熾口乾作渴  
小便頻赤此腎經虛熱用補中益氣湯六味丸而痊  
一儒者善嚏患痒余以為內有濕熱腠理不密外邪所  
乘也與補中益氣湯加白芷川芎治之不從自服荆防  
敗毒散盜汗發熱作渴熾痛膿水淋漓仍用前湯倍加

參芪五味而痊

一儒者患在臂脚日晡或痒或脹形體倦怠自服敗毒散痛處發腫小便赤澀此肺腎陰虛余用補中益氣加五味麥門冬而愈

一儒者患此誤用攻伐之劑元氣虛而不能愈用補中益氣湯加茯苓其瘡頓愈又因調養失宜日晡益甚用八珍湯加五味麥門五十餘劑而愈

一男子色黯作痒出黑血日晡益甚其腿日腫夜消余



以為氣血虛而有熱朝用補中益氣湯夕用加味道遙散而愈

一男子時疫愈後所患如前用藥補養而愈有同患用砭法出血而死此因陰虛血熱色黑作痒也何乃反傷陰血哉

一婦人久不愈食少體倦此肝脾虧損而虛熱先用補中益氣湯加川芎炒山梔元氣漸復更以逍遙散而瘡漸愈若夜間譫語此熱入血分用小柴胡湯加生地黃

治之血虛者四物合小柴胡湯熱退却用逍遙散以補脾胃生陰血亦有寒熱如瘧亦治以前藥

附骨疽

附骨疽有因露臥風寒深龍襲於骨者有因形氣損傷不能起發者有因尅伐之劑虧損元氣不能發出者有因外敷寒藥血凝結於內者凡此皆宜灸熨患處解散毒氣補接陽氣溫補脾胃為主若飲食如常先用仙方活命飲解毒散鬱隨用六君子湯補托榮氣若體倦食少

但用前湯培養諸臟使邪不得勝正若膿已成即針之使毒不得內侵帶生用針亦無妨如用火針亦不痛且使易斂其隔蒜灸能解毒行氣葱熨法能助陽氣行壅滯此雖不見於方書余常用之大効其功不能盡述惟氣血虛脫者不應

### 治驗

南司馬王荆山腿腫作痛寒熱發渴飲食如常脈洪數而有力此足三陽經溼熱壅滯用檳蘇敗毒散一劑而寒熱

止再劑而腫痛消更用逍遙散而元氣復兩月後因怒腫痛如錐赤暈散漫用活命飲二劑而痛緩又用八珍湯加柴胡山梔丹皮而痛止復因勞役倦怠懶食腿重頭暈此脾胃氣虛而不能升舉也用補中益氣湯加蔓荊子而安一儒者左腿微腫肉色如故飲食少思此真氣虛而溼邪內襲也蓋諸氣皆稟於胃法當助胃壯氣遂用六君加藿香木香當歸數劑飲食漸進更以十全大補元氣漸復而愈

一儒者兩腿癰痛肉色不變惡寒發熱飲食少思肢體  
倦怠脾氣不足濕痰下注也以補中益氣加半夏茯苓  
芍藥二劑寒熱退而癰痛消又十餘劑脾胃壯而形體  
健

一男子患此入房兩臂硬癰二便不通余謂腎開竅於  
二陰乃肝腎虧損也用六味丸料加車前牛膝而二便  
利用補中益氣而腫硬消喜其年少得生

一上舍內痛如錐肉色如故面黃懶食痛甚作嘔此痛

傷胃也用六君子以壯其脾胃用十全大補以助其膿而針之更用前湯倍加參芪芎歸麥門五味遠志貝母而瘡斂

一男子因負重飲食失節胸間作痛誤認為瘡毒服大黃等藥右腿股瘡肉色如故頭痛惡寒喘渴發熱脈洪大而無力此勞傷元氣藥損胃氣而然耳用補中益氣湯四劑又用十全大補湯數劑喜其年少而愈

多骨疽

多骨疽者由瘡瘍久潰氣血不能營於患處邪氣陷襲  
久則爛筋腐骨而脫出屬足三陰虧損之症也用補中  
益氣湯以固根本若陰火發熱者佐以六味丸壯水之  
主以鎮陽光陽氣虛寒者佐以八味丸益火之源以消  
陰翳外以附子餅蔥熨法祛散寒邪補接榮氣則骨自  
脫瘡自斂矣夫腎主骨若腎氣虧損其骨漸癢荏苒歲  
月潰而出骨亦用前法若投以剋伐之劑復傷真氣鮮  
有不誤者

治驗

舉人于廷器腿患流注年餘出腐骨少許午前畏寒午  
後發熱口乾吐痰小便頻數余以為足三陰虧損朝用  
補中益氣湯夕用六味丸料加黃芪當歸五味子各三  
十餘劑外用豆豉餅諸症漸愈又以十全大補之類喜  
其慎疾而愈

一儒者患附骨疽失于調理瘡口不斂日出清膿少許  
已而常出三腐骨其脈但數而無邪此氣血虛瘡結膿



管而未能愈繼以烏金膏日服十全大補湯而愈

工舍王廷璋患前症三年未愈肢體消瘦飲食難化手足並冷大便不通手足陰冷余謂此陽氣虛寒用補中益氣湯八味丸及灸其患處而痊

一男子上脘腫硬年餘方潰內熱作渴肢體消瘦六脈洪大左手尤甚用補中益氣湯六味丸出腐骨一塊仍服前藥諸症悉去瘡口亦斂

一男子十六歲間足腫黯潰而露骨體瘦盜汗發熱口

乾用十全大補湯六味地黃丸各五十餘劑而愈不然  
多變瘵症或瀝盡氣血而亡

一婦人年三十餘素弱左手背漸瘰二年後潰出清膿  
瘰黯連臂內熱晡熱自汗盜汗經水兩月一至此肝脾  
氣血虧損朝用歸脾湯夕用逍遙散腫處頻用葱熨法  
兩月餘諸症漸愈瘡出腐骨仍服前藥前後共三百餘  
劑得愈

翻花瘡

翻花瘡者由瘡瘍潰後肝火血燥生風所致或瘡口腐肉突出如菌大小不同或出如蛇頭長短不一治法當滋肝補氣外塗藜蘆膏內自入須候元氣漸復膿毒將盡塗之有效不然雖入而復潰若誤用刀針蝕藥灸法其勢益甚或出血不止必致寒熱嘔吐等症須大補脾胃為善

治驗

判官張承恩內股患癰將愈翻出一肉如菌余曰此屬

肝經風熱血燥當清肝熱養肝血彼為不然乃內用降火外用追蝕而復翻翻而復蝕其肉益大元氣益虛始信余言遂內用梔子清肝散外用藜蘆膏而痊

一上舍素膏梁善怒耳下結一核從潰而瘡口翻張如菌焮連頭痛或胸脇作脹或內熱寒熱或用清熱消毒之藥年餘未瘥余用補中益氣湯六味地黃丸而尋愈一男子背瘡斂如豆許翻出肉寸餘用消蝕割繫法屢去屢大此肝經血虛風熱余用加味逍遙散三十餘劑

塗藜蘆膏而消又用八珍散倍用參芪歸朮而斂

一婦人素善怒臂患癰瘡口出肉長二寸許此肝脾鬱  
怒氣血虛而風內動用加味道遙散塗藜蘆膏而愈後  
因怒患處脹悶遍身汗出如雨此肝經風熱風能散氣  
故耳仍用前散并八珍湯而愈

一男子項患腫痰涎湧甚用散堅行氣等劑腫硬愈甚  
喘氣發熱自汗盜汗體倦食少余曰此屬足三陰虧損  
當滋化源不信反追蝕患處開翻六寸許慘嘔色赤日

出鮮血三月餘矣肝脈弦洪緊實余用大補湯加麥門  
五味五十餘劑諸症漸愈血止三四復因怒飲食頓少  
其血湧出此肝傷不能藏脾傷不能攝也用補中益氣  
湯為主加五味麥門其血頓止再以六味丸加五味子  
常服瘡口斂至寸許遂不用藥且不守禁而歿

薛氏醫案卷十四

欽定四庫全書

子部

薛氏醫案卷十五

詳校官太醫院醫士臣趙止池

編修臣倉聖脈覆勛

總校官原任中允臣王燕緒

校對官助教臣卜維吉

謄錄監生臣謝蓮錡

欽定四庫全書

薛氏醫案卷十五

明薛己撰

外科樞要三

腎癰

男婦同用

腎膀胱經部分也居小腹之後此陰中之陰其道遠其位僻雖太陽多血氣運難及血亦罕到中年後尤慮此患治者毋傷脾胃毋損氣血但當固根本為主若瘡硬



作痛者形氣虛而邪氣實也用托裏消毒散主之微瘰  
微痛者形氣病氣俱虛也用托裏散補之欲作膿用托  
裏羌活湯若痛甚用仙方活命飲大勢既退亦用托裏  
消毒散若脾虛不能消散或不潰不斂者六君子加芎  
歸黃芪若陰虛不能消散或作渴便淋者六味九加五  
味子若陽虛不能潰或膿清不能斂者用補中益氣湯  
氣血俱虛者十全大補湯若瘰硬未成膿者用隔蒜灸  
活命飲潰後豆豉餅補中益氣十全大補二湯若灸後

大勢已退餘毒未消頻用葱熨以補其氣以消餘毒為善

治驗

巡撫陳和峯脾胃不健常服消導之劑左腿股及臀患  
瘰余曰此脾氣虛而下注非瘡毒也當用補中益氣倍  
加白朮彼惑於衆論云白朮能潰膿乃專以散毒消毒  
為主而瘰益甚體益倦余用白朮一味煎飲而消

儒者楊啟元左臀患此敷貼涼藥腫徹內股服連翹消  
毒散左體皆痛余以為足三陰虧損用補中益氣湯以

補脾肺用六味丸加五味以補肝腎股內消而臀間潰  
又用十全大補湯而瘡口斂

一儒者腫焮痛甚此邪毒壅滯用活命飲隔蒜灸而消  
後因飲食勞倦腫痛仍作寒熱頭疼此元氣虛而未能  
復也與補中益氣湯頻用葱熨法兩月而愈

一男子漫腫而色不變脉滑數而無力膿將成矣余用  
托裏而欲針彼畏針而欲內消誤用攻伐之藥頓加惡  
寒發熱自汗等症余用十全大補湯數劑腫起色赤仍

外針內補而愈

崑庠吳輔之父患此內潰癰脹發熱口乾飲食少思此脾胃虛弱也先用六君加芎歸芪數劑而潰又用十全大補湯倍加參芪五十餘劑而愈

南濠沈克章子年三十脉如屋漏雀啄腫硬七天膿水清稀誤服敗毒之藥余曰此足三陰虧損而藥復傷也余用六君加歸芪附子一錢二劑癰潰色赤又減附子五分數劑元氣復而瘡愈

一男子硬痛發熱此膀胱氣虛而濕熱壅滯用內托羌活湯二劑熱痛悉退後用托裏消毒散而潰又用托裏散四十餘劑而斂

平湖袁上舍患痔外敷寒涼內服消毒攻潰於臀膿水清稀脉洪大而數寒熱作渴余辭不治後果歿此足三陰虧損之症失滋化源以致真氣益虛邪氣愈甚矣不死何俟

囊癰 謂陰囊患癰

囊癰屬肝腎二經陰虛濕熱下注若小便瀉滯者先分利以泄其毒繼補陰以令其自消若濕熱退而仍癰痛宜補陰托裏以速其膿膿焮而便穢者熱毒壅閉也先用托裏消毒散後用針以泄之膿去即解若膿去而癰痛不減者熱毒未解也用清肝養榮湯口乾而小便數者腎經虛熱也六味丸內熱晡熱者肝經血虛也四物加參朮體倦食少者脾氣虛熱也補中益氣湯膿水清稀者氣血俱虛也十全大補湯此症雖大潰而罨丸懸

露治得其法旬日肉漸生而愈若專攻其瘡陰道始虛則腫者不能潰潰者不能斂少壯者多成涸疾老弱者多致不起亦有患痔漏久而串及於囊者當無治其痔切忌寒藥尅伐虧損胃氣

治驗

給事陸貞山腫赤脹痛小便瀉滯寒熱作渴此肝腎陰虛濕熱下注也當清肝火除濕毒遂用柴胡炒龍膽吳茱萸炒黃連當歸銀花皂角刺赤芍藥防風木通甘草

節一劑痲痛漸退少加防風木通川芎茯苓作飲下滋  
腎丸以補陰其熱痲俱退但內有一條筋不消此肝經  
血氣虛損也當滋腎水用六味丸料去茯苓加五味二  
劑再用補中益氣加茯苓作飲送滋腎丸筋頓消而愈  
京兆朱二峯陰囊脹痛彼以為疝余診其脉數而滑此  
囊癰也因肝腎二經陰虛濕熱所致膿已成矣服活命  
飲一劑而潰更用補陰托裏而斂

知州王汝道先晡熱發熱肢體倦怠入房則腿足酸軟



足心熱至腿膝六脉洪數兩尺為甚余以足三陰虛欲  
滋補化源彼反服苦寒降火之劑後陰囊腫脹用治疝  
之藥腫脹益甚形氣愈虛服溫補之劑腫痛上攻小便  
不利兩尺脉洪滑按之虛甚余曰此囊癰也因氣血虛  
而不能潰先用補中益氣湯加山藥山茱萸車前子柴  
胡山梔一劑腫脹頓消隨用六味丸料加車前牛膝柴  
胡山梔一劑小便漸通乃用活命飲與前二藥消息無  
用至二十餘劑囊裂出穢膿甚多乃用托裏消毒散六

劑膿穢清又用托裏散數劑膿水漸少更用補陰托裏散及十全大補五十餘劑而痊

儒者陳時用考試不利一夕飲燒酒入房妻不納翌日陰囊腫脹焮痛遣人求治余以除濕熱清肝火之劑城門夜閉不及歸服翌早報云夜來陰囊悉腐玉莖下面貼囊者亦腐此肝火挾酒毒而濕熱熾盛也仍以前藥加參芪歸朮四劑腐肉盡脫罽丸懸掛用大補氣血并塗當歸膏囊莖全復而愈

一膏梁之客陰囊腫脹小便不利此中焦積熱乘虛下  
注先用龍膽瀉肝湯加黃栢知母黃連牛膝四劑漸愈  
後用補陰八珍湯加柴胡山梔而愈後不守禁忌前症  
復作仍用補陰八珍湯補中益氣湯六味丸而痊又因  
勞發熱自用四物黃栢知母之類虛症悉具瘡口開大  
余謂五臟氣血俱虛也朝用補中益氣夕用六君子加  
當歸各五十餘劑瘡口漸斂又用六味丸調補全愈  
府庠李達卿素腎虛發熱久服黃栢知母之類形體漸

瘦遺精白濁晡熱唾痰余曰此腎水虧損虛火內熾用  
補中益氣之類加五味麥門前症將愈又別用清熱涼  
血之劑飲食少思唾痰不止余以為脾肺復虛不能攝  
涎歸源仍用前湯加茯苓半夏而愈後入房頭暈吐痰  
腰骨作痛大小便道牽痛余曰此精已耗而復竭所致  
危殆之症也遂朝用前湯加麥門五味夕用六味九料  
加五味子萆薢五十餘劑諸症頓退後又入房陰囊陰  
莖作痛別用淡滲之劑陰囊內潰余用補陰托裏之劑

出膿甚多喜腫消痛止竟不善調養以致大便不通小便如淋痰涎上湧余曰腎虛之症復作矣誠為可慮有保其可生者用礞石滾痰丸牛黃清心丸之類吐痰愈加余曰非惟無以保其生而反促其危矣固辭不治後果歿

一男子醉而入房陰囊腫脹大如斗小腹脹悶小水淋赤發熱口乾痰涎壅甚此膀胱陰虛酒毒所乘也用六味丸料加車前牛膝作飲下滋腎丸諸症頓退再加五

味麥門二劑而愈却以補中益氣加麥門五味調理而  
康若用淡滲復損真陰決致不起

### 懸癰

懸癰謂瘡生於玉莖之後穀道之前屬足三陰虧損之  
症輕則為漏泄盡氣血而亡重則內潰而即殞若初起  
濕熱壅滯未成膿而作痛或小便瀦滯用龍膽瀉肝湯  
瘡焮痛甚仙方活命飲並以製甘草佐之如此雖患亦  
輕雖潰亦淺若不能成膿或膿成不潰者八珍散補之

若膿已成者急針之欲其生肌收斂腎虛者六味地黃  
丸血虛者四物加參朮氣虛者四君加芎歸脾虛者補  
中益氣湯氣血俱虛者八珍湯并十全大補湯若用寒  
涼消毒則誤矣

治驗

尚寶鮑希傳日發熱服四物黃柏知母之類年餘患囊  
癰唾痰作渴飲湯其熱至膝更加苓連二陳熱痰益甚  
謂余曰何也余曰此足三陰虧損水泛為痰寒涼之劑

傷胃而甚耳遂先用補中益氣夕用六味九間佐以當歸補血湯半載乃愈

趙州守患此症瘡多作痛五月餘矣晡熱口乾盜汗食少體倦氣短脉浮數而無力此足三陰氣血虧損用補中益氣加製甘草五味麥門三十餘劑食進勢緩又用六味九料五十餘劑膿潰瘡斂後因怒作痛少食脇痛發熱仍用前藥賴其稟慎疾而愈

通府張敬之患前症久不愈日晡熱甚作渴煩喘或用



四物湯黃栢知母之類前症益甚更體倦少食大便不實小便頻數謂余曰何也余曰此脾虛之症前藥復傷而然也遂用補中益氣加茯苓半夏數劑飲食漸進諸症漸愈更加麥門五味調理乃痊經云脾屬至陰為陰土而主生血故東垣先生云脾虛元氣下陷發熱煩渴肢體倦怠等症用補中益氣湯以升補陽氣而生陰血若誤認為腎虛輒用四物黃栢知母之類反傷脾胃生氣是虛其虛矣况黃栢知母乃瀉陽損陰之劑若非勝

膀胱火盛而不能生陰水以致發熱者不可用也

一儒者患此服坎離丸及四物黃柏知母之類不應脉浮洪按之微細余以為是三陰虛用托裏散及補陰托裏散漸愈又用六味丸補中益氣湯調補化源半載而痊大凡瘡瘍等症若腎經陽氣亢盛致陰水不能化生而患陰虛發熱者宜用坎離丸取其苦寒能瀉水中之火令陽氣衰而水自生若陽氣衰弱致陰水不能化生而患陰虛發熱者宜用六味丸取其酸溫能生火中之

水使陽氣旺則陰自生況此症屬腎經精氣虧損而患者十有八九屬腎經陽氣亢盛而患者十無一二然江南之人患之多屬腎經陰血虧損元氣下陷須用補中益氣湯升補陽氣使陽生而陰長若嗜慾過多虧損真水者宜用六味丸補腎經元氣以生精血仍用補中益氣湯以培脾肺之生氣而滋腎水經云陰虛者脾虛也多誤以為腎經火症用黃柏知母之類復傷脾肺絕其化源反致不起惜哉

上舍劉克新潰後作痛發熱口乾小便赤澹自用清熱  
消毒之藥不應左尺洪數余以為陽氣盛而陰氣虛也  
先用四物湯加黃柏知母等諸劑瀉其陽氣使陰自生  
服數劑諸症漸愈後用補中益氣湯六味地黃丸補脾  
肺滋腎水而瘡口愈

一儒者小便赤澀勞則足軟痲痛發熱口乾舌燥食少  
體倦日晡益甚此氣血虛而未能潰也遂用八珍湯加  
麥門山藥倍用製甘草數劑諸症悉退但患處痲痛此

膿內焮也又五劑膿自湧出又五十餘劑而瘡口將完  
又因勞役且停藥寒熱作渴瘡痛膿多用補中益氣湯  
加炒山梔二劑少愈又以八珍湯加麥門五味百餘劑  
瘡痛悉去喜其慎起居節飲食常服補劑而安但勞則  
出膿一二滴後惑於他言內用降火外用追蝕必其收  
斂致患處大潰幾至不起仍補而愈

便癰

一名便毒  
一名疔瘡

便癰屬厥陰肝經內熱外寒或勞倦過度或房慾不節

或慾心不遂或強固其精或肝經濕熱而致治法內熱  
外寒者雙解散勞倦過度者補中益氣湯房慾不節者  
六味丸料慾心不遂者先用五苓散加大黃疏其精滯  
後用地黃丸以補其肝腎強固其精或濕熱壅滯者宜  
用龍膽瀉肝湯疏肝導滯夫便澀血疝也屬厥陰肝經  
之絡脉衝任督脉之隧道故婦人患此多在兩拘腫痛  
或腹中結塊小便澀滯苟治者得法患者又能調攝何  
難斂之有若槩用大黃等劑以求其內消或令膿從便

下損其氣血及不慎起居飲食者皆為不治

治驗

府庠沈尼文年二十左拘患之余以肝腎陰虛先用托裏藥潰而將愈因入房發熱作渴右邊亦作痛膿水清稀虛症悉至脉洪大而無力勢甚可畏用十全大補加附子一錢脉症頓退再劑全退後用大補湯三十劑而愈

一儒者癰痛便澀用八正散二劑清肝火導濕熱而癰

痛愈再以小柴胡加芎歸澤瀉山梔二劑清肝火補脾  
血而小便利

一男子潰而腫痛不止此餘毒未解用活命飲一劑而  
痛止再劑而腫消

一男子痛甚發熱用前飲一劑痛止再以神效瓜蒌散  
加山梔柴胡二劑而消

一男子腫而不潰余謂此因陽氣虛弱用參芪歸朮以  
補托元氣用白芷皂角刺柴胡甘草節以排膿清肝數



劑而潰以八珍加柴胡補其氣血數劑而愈

一男子已潰而痛不止小便秘澀此肝火未解也與小柴胡湯加黃柏知母芍歸痛止便利更以托裏當歸湯而瘡斂若毒未解而痛不止者須用活命飲

一婦人素清苦因鬱怒患前症或用敗毒寒涼之藥反晡熱內熱自汗盜汗月經不行口乾咽燥余謂此鬱氣傷脾因藥復損先以當歸湯數劑後兼逍遙散各五十餘劑而諸症皆愈

一婦人小腹內如有所梗兩物并人門俱腫小便淋澀  
經候不調內熱作渴飲食少思腹內初如雞卵而漸大  
脉洪數而虛左關尤甚屬肝脾鬱結之症也用加味歸  
脾湯肝火退而脾土健間以逍遙散下蘆薈丸而愈  
一婦人兩物癰痛腹內一塊不時上攻月經不調小便  
不利余以為肝脾氣滯以四君加芎歸柴胡山梔而愈  
後因鬱怒前症復作却兼胸脇脹滿盜汗此肝木甚而  
傷脾土用加味歸脾湯下蘆薈丸而痊

一婦人小腹內或作痛或痞悶兩拘瘕痛內熱寒熱胸膈不利飲食不甘形體日瘦此肝氣滯而傷脾氣朝用補中益氣湯夕用六味丸漸愈更用蘆薈丸而全愈

一婦人兩拘瘕痛小腹痞脹小便時數白帶時下寒熱往來小水淋瀝余謂肝氣滯而血病用龍膽瀉肝湯漸愈又用加味道遙散六味丸而全愈

一婦人患前症胸脇脹悶或小便不利或時作痛小便瀯滯服疏氣豁痰等藥益甚余謂肝火氣分之病用龍

膽瀉肝湯以清肝熱又用加味道遙散以生肝血六味  
丸以滋腎水而愈

一婦人患前症余謂此肝脾鬱怒之症不信別服化痰  
利氣之劑胸腹脹悶又服峻利疏導之劑變脾虛發瘡  
之症而歿

一婦人兩脇痠痛內熱作渴飲食不甘肢體倦怠陰中  
作梗小便赤澀為肝脾陰虛濕熱用加味歸脾湯而愈  
後因怒復作小腹痠脹小便不利用小柴胡加山梔芎

歸以清理肝火脹痛頓止又以加味道遙散調補肝火而痊

一婦人兩拘作痛寒熱內熱小便赤澀胸脇不利此肝火動而脾氣傷用補中益氣湯加茯苓數劑少愈又與加味歸脾湯諸症悉退再用加味道遙散而全愈

一婦人小腹痞悶小便不利內熱體倦懶食此氣血虛而兼肝火用八珍湯加柴梔膽草治之而安

一婦人陰中如梗兩拘痠痛寒熱不食小便頻數小腹

重墜余以為肝脾鬱結所致先以補中益氣湯加山梔  
茯苓車前子青皮以清肝火升脾氣更以加味歸脾湯  
二十餘劑調理脾鬱而愈

下疳瘡

婦人陰瘡等症見女  
科撮要婦人良方

下疳屬肝經濕熱下注或陰虛火燥治法瘡痛發熱者  
血虛而有熱也四物湯加柴胡山梔瘡痛寒熱者肝經  
濕熱也小柴胡湯加龍膽草黃連瘡痛便澀者濕熱癰  
滯也龍膽瀉肝湯瘡痛腐潰者氣血虛而有火也八珍

湯加山梔柴胡日晡熱甚者陰血虛而有熱也小柴胡湯加參朮芎歸日晡倦怠者陽氣虛而下陷也補中益氣湯其經久不愈而發寒熱者腎水不能生肝木也用六味丸若筋縮縱或為痒痛或出白津此筋疝也用龍膽瀉肝湯氣虛者補中益氣加炒山梔炒龍膽陰虛火燥者用六味丸莖中痒出白津用補中益氣湯與清心蓮子飲間服蓋此症肝經陰虛為本腫痛寒熱等症為標須用六味丸以生肝血凡脾土虛不能生金水而見

一切肝症者當佐以補中益氣湯加麥門冬以滋化源

治驗

庶吉士劉華甫或莖中作痛或竅出白津或小便秘澀  
先用小柴胡湯加山梔澤瀉黃連木通膽草茯苓二劑  
以清肝火導濕熱諸症漸愈後因勞倦忽然寒熱此元  
氣復傷也用補中益氣而安又用六味丸以生肝血滋  
腎水而全愈

州守姜節甫患前症膿水淋漓作渴吐痰午前惡寒午



後發熱余曰午前惡寒屬陽氣虛弱午後發熱屬陰血不足不信反服二陳黃柏知母之類飲食益少大便不實又日晡熱渴小腹重墜患處焮痛仍用四物黃柏知母之類飲食亦不思余以脾氣虛而下陷先用補中益氣湯調養脾胃以升陽氣諸症漸愈又用六味丸滋補腎水以生肝血而痊

一小兒十五歲患前症雜用消毒之藥虛症悉具二年餘矣詢之乃稟所致用單解湯月餘諸症漸愈又用補

陰八珍補中益氣二湯而痊

一儒者莖中作痒發熱倦怠外皮浮腫二年矣用八珍加柴胡山梔及六味地黄丸而愈有無陰毛間生蟲作痒者用桃仁研爛塗之

一儒者因勞而患焮痛寒熱體倦頭疼小便赤澀用補中益氣湯加車前牛膝山梔而愈

一儒者陰莖腐爛腫痛不止日晡熱甚口乾體倦食少欲嘔此肝脾血虛也先用六君子加柴胡升麻脾胃醒

而諸症退更以補中益氣加炒山梔肝火退而腫痛痊

痔瘡

男婦同治

痔屬肝脾腎三經故陰精虧損者難治多成漏症若肺與大腸二經風熱濕熱者熱退自愈不守禁忌者亦成漏症此因醉飽入房筋脉橫解精氣脫泄熱毒乘虛流注或淫極強固其精以致水乘火勢而侮金或炙燂厚味或勞傷元氣陰虛火熾所致初起焮痛便秘或小便不利者宜清熱涼血潤燥疏風若氣血虛而寒涼傷損

者調養脾胃滋補陰精若破而久不愈多成痔漏有穿  
臀穿陰穿腸者其腸頭腫魄者濕熱也作痛者風熱也  
便結者火燥也潰膿者熱勝血也大便秘作痛者潤燥除  
濕肛門墜痛者瀉火除濕小便澀滯者清肝導濕其成  
漏者養元氣補陰精為主經云因而飽食筋脉橫解腸  
澀為痔其屬肝脾腎也明矣若有患痔而無疝患疝而  
無下疳皆屬肝腎不足之變症但用地黃丸益氣湯以  
滋化源為善若專服寒涼治火者無不致禍

治驗

進士周希輔素有疝痔勞則小腹作痛莖出白津痔亦  
腫痛若飲食勞倦起居失宜則發寒內熱肢體疲倦服  
十全大補湯諸症並退彼欲去病根乃用攻病生肌之  
藥肌體骨立余用益氣湯地黃丸元氣漸復但自弛調  
攝不能全愈

一儒者膿血淋漓口乾作渴晡熱便血自汗盜汗余謂  
此腎肝陰虛也不信仍服四物栢知連之類食少瀉嘔

余先用補中益氣湯加茯苓半夏炮薑脾胃漸醒後用六味丸朝夕服兩月餘諸症悉愈

儒者楊舉元素陰虛勞則肢體倦怠兩足發熱服清熱等劑熱至腰膝大便澀滯飲食過多則瀉至年餘作渴吐痰患痔出膿仍不節勞則忽惡寒發熱復患癰膿水不止氣血虛甚余用六味丸補中益氣湯滋養化源喜其慎疾年餘而痊

一男子患此服寒涼之劑侵晨去後不實食少體倦口

乾作渴小腹重墜余用補中益氣湯而下墜頓止用四神丸而食進便實用地黃丸而瘡尋愈

一膏梁酒色之人患之作痛服苦寒之藥致腎腫硬又加大黃腹脹頭痛此足三陰虧損而藥復傷余用補中益氣湯升補陽氣加參苓半夏木香以助脾氣數劑而愈

上舍陸子藩時仲冬患痔作痛右手浮大左尺洪數余曰冬見夏脉當壯水之主以鎮陽光彼以為迂別服苓

連之劑越明年六月九日復邀視之痰涎上湧日夜不寐脉洪大而數按之無力左尺全無足手肩膊逆冷余曰事急矣彼云但求少延數日以待嗣子一見耳勉用參芪歸朮炮薑之類及六味丸料加肉桂至本月丁酉日果歿五行之理信然

侍御王兩湖長子患痔作渴發熱尺脉洪數按之無力余曰此肝腎陰精虧損而虛火妄動當滋化源彼不信後吐痰聲嘶面赤體瘦而歿



便血

婦人症見  
女科撮要

經云邪在五臟則陰脉不和陰脉不和則血留之陰氣  
內結陽絡外傷滲入腸間故便血也針經云陽絡傷則  
血外溢而衄血陰絡傷則血內溢而便血皆因飲食失  
節起居不時七情六淫失宜內傷外感所致若外感則  
血鮮名腸風內傷則血濁名臟毒外感而元氣實者人  
參敗毒散加槐花荆芥以祛邪氣內傷而元氣虛者亦  
用六君子湯以補胃氣元氣下陷者補中益氣湯以升

舉之憂思傷脾者濟生歸脾湯以解之糞前見血者益氣湯加吳茱萸糞後見血者加黃連陰血不足者宜用四物湯病因多端不能盡述當臨症制宜庶無誤矣丹溪先生云精氣血氣出於穀氣惟大便下血當以胃氣收功治者審之

治驗

一儒者素善飲不時便血或在糞前或在糞後食少體倦面色痿黃此脾氣虛而不能統血以補中益氣湯加

吳茱萸黃連三十餘劑而再不發

一男子每怒必便血或吐血即服犀角地黄湯之類余  
曰此脾虛不能攝血恐不宜用此寒涼之藥仍服之日  
加倦怠面色痿黃更用四物芩連丹皮之劑飲食少思  
心煩渴熱吐血如湧竟至不起若用四君芎歸補中益  
氣湯多有得生者

脫肛男婦同治

脫肛屬大腸氣血虛而兼濕熱有久痢氣血俱虛而脫

者有因腎虛而脫者有中氣虛而脫者有因血虛而脫者濕熱者升陽除濕湯血熱者四物加條芩槐花血虛者四物加白朮茯苓兼痔而痛者四物加槐花黃連升麻久痢者補中益氣湯加酒炒芍藥中氣虛陷者前湯加半夏炮薑茯苓五味腎虛者六味丸虛寒者八味丸肺與大腸為表裏肛者大腸之門肺實熱則秘結肺虛寒則脫出腎主大便故腎虛者多患此症

治驗

舉人于時正素有痔每勞役便脫肛腫痛出水中氣下  
陷者用補中益氣湯加茯苓芍藥十餘劑中氣復而愈  
後復脫作痛誤服大黃丸腹鳴惡食幾危余用前湯加  
炮薑芍藥諸症漸愈後去薑加熟地五味三十餘劑而  
愈

一男子脾胃素弱或因勞倦或因入房肛門即下腫悶  
痛甚用補中益氣湯加麥門五味兼六味丸而愈後因  
過飲下墜腫痛誤用降火消毒虛症蜂起余用前湯加

炮薑木香一劑再用前湯并加減八味丸兩月而安  
一儒者面白神勞素畏風寒飲食喜熱稍多必吞酸作  
瀉吸氣覺冷便血盜汗余以為脾腎虛寒用補中益氣  
加炮薑肉桂五十餘劑八味丸勸許諸症悉愈

腎臟風瘡

男婦同治

腎臟風屬腎虛風邪乘於臙脛以致皮膚如癬或漸延  
上腿久則延及遍身外症則搔痒成瘡膿水淋漓眼目  
昏花內症則口燥舌乾腰腿倦怠吐痰發熱盜汗體疲

治法用六味丸為主佐以四生散若脾胃虛弱者用補中益氣為主佐以六味丸四生散為善

治驗

欽天薛循齋六十有一兩臘患之膿水淋漓發熱吐痰四年矣此腎臟風症也與六味丸四生散而瘥年餘復作延及遍身日晡益甚痰渴盜汗唇舌生瘡兩目昏赤皆腎經虛火而水泛為痰用加減八味丸而愈三年後小便淋漓莖中瀉痛此思色精不出而內敗也用前丸

及補中益氣湯加麥門五味而愈

臙瘡

婦人症見女科撮要婦人良方

臙瘡生於兩臙初起赤腫久而腐潰或津淫搔痒破而膿水淋漓蓋因飲食起居虧損肝腎或因陰火下流外邪相搏而致外臙屬足三陽濕熱可治內臙屬足三陰虛熱難治若初起惡寒壯熱癰焮作痛者屬濕熱用栝蘇敗毒散若漫腫作痛或不腫不痛者屬陰虛用補陰八珍湯若膿水淋漓體倦食少內熱口乾者屬脾虛用



補中益氣加茯苓酒炒白芍藥若午後熱或作痛頭目  
不清者屬陰火前湯加酒炒黑黃栢及六味地黃丸若  
午後發熱至子時分方止是血虛前湯加芍歸熟地若  
鬱結傷脾而甚用歸脾湯加柴胡山梔若怒動肝火而  
甚用補中益氣湯加川芎山梔黃芩內熱口乾肢體倦  
怠或痰涎上升或口舌生瘡屬脾腎虛熱用六味地黃  
丸補中益氣湯若患處黑黯肢體畏寒飲食少思屬脾  
腎虛敗用八味地黃丸若誤用攻伐復損胃氣絕其化

源治亦難矣

治驗

鴻臚翟少溪兩膝生瘡漸至遍身發熱吐痰口燥咽乾盜汗心煩溺赤足熱日晡益甚形體日瘦此腎經虛火也用六味丸不月諸症悉退三月元氣平復

一男子左腿腫肉色如故寒熱惡心飲食少思此脾氣不足而為外邪所感也用六君加藿香桔梗川芎而寒熱止又用補中益氣湯而腫痛消

陳湖陸懋誠素因陰虛過飲入房發熱腿痛似膝瘡用發表之劑兩腿腫黯熱氣如霧欲發痙脉皆洪數兩尺尤大余曰屬足三陰虛酒濕所乘元氣損而邪益甚耳用十全大補加山藥山茱萸附子一劑脉症頓退却去附子又二劑全愈

一男子先於兩膝後及遍身生瘡似疥非疥時或膿水淋漓兩腿為甚肢體倦怠作痒煩熱年餘不愈余作腎經虛火用加減八味丸而痊

一男子腿患癱服尅伐之藥虧損元氣不能成膿余為  
托裏而潰大補而斂若大便結燥用十全大補湯加麥  
門五味而潤月餘仍結自服潤腸丸而瀉不止余用補  
中益氣湯送四神丸數服而愈

足跟瘡

婦人症詳見  
婦人良方

足跟乃督脉發源之所腎經所過之地若飲食失節起  
居失宜虧損足三陰經則成瘡矣若漫腫寒熱或體倦  
少食屬脾虛下陷也用補中益氣湯若晡熱作痛頭目

不清屬脾虛陰火也前湯并六味丸若痰涎上升或口  
舌生瘡屬腎水乾涸也前湯并加減八味丸凡此皆當  
滋其化源若治其外則誤矣俗云兔啣瘡者蓋獵人被  
兔咬足跟久而不斂氣血滙盡而死

治驗

大尹陳汝鄰兩腿酸軟或赤或白足跟患瘡或痛或痒  
後痛而或如無皮或如皸裂日晡至夜脹痛熾熱用補  
中益氣湯加八味丸料補其肝腎而愈

一男子足跟作痛熱渴體倦小便如淋誤用敗毒散致頭痛惡寒欲嘔不食吐痰咳嗽此足三陰虧損而藥復傷余用十全大補湯加減八味丸各五十餘劑而愈

一男子素不慎起居內熱引飲作渴體倦兩足發熱後足跟作痛或用清熱除濕之劑更加發瘡又服敗毒之藥焮赤痛甚略用祛毒清熱潰裂番張狀如赤榴熱痛如錐內熱晡熱此因足三陰虧損朝用十全大補湯夕用加減八味丸外敷當歸膏兩月餘而愈其服消毒等

藥而歿者不能枚舉

一男子亦患此服消毒散搽追蝕藥虛症疊出其形體  
骨立自分必死余用十全大補兼山茱山藥兩月餘而  
愈

一膏粱之人兩脚發熱作渴左尺脉數而無力余謂此  
足三陰虧損防患疽不信反服清熱化痰之藥更加晡  
熱頭暈又服四物黃柏知母日晡熱甚飲食漸少覺足  
面發疽余用補中益氣六味地黃丸百餘服而愈不信

患疽以致不起者多矣

一婦人勞則足跟熱痛余以為足三陰虛用八珍湯而  
痊後遍身搔痒誤服風藥發熱抽搐肝脉洪數此肝家  
血虛火盛而生風以天竺膽星為丸用四物麥門五味  
苓連炙草山梔柴胡煎送下而愈

一婦人兩足發熱兩跟作痛日晡熱甚余以為肝腎血  
虛用加味道遙散六味地黃丸五十餘劑諸症悉愈

一婦人素血虛因大勞兩足發熱晡熱月經過期或用



四物黃連飲食少思胸痞吐痰用二陳枳實黃連大便不  
實吐痰無度足跟作痛余曰足熱晡熱月經過期乃肝  
脾血虛也胸痞吐痰飲食少思脾胃虛也蓋胃為五臟  
之根本胃氣一虛諸症悉至先用補中益氣湯加白朮  
苓半夏脾胃漸健乃佐以六味地黄丸以補脾腎不兩  
月而痊

一婦人經候不調發熱晡熱胸膈不利飲食少思服清  
熱寬中消導之劑前症益甚更兼肢體酸痛服除濕化

痰等藥經候兩月一至服通經降火等劑兩足跟指作  
痛其熱如炙余以為足三陰虧損用補中益氣六味地  
黃丸兩月諸症漸退又用前湯并八珍散兩月而康  
一婦人足跟患瘡兩腿酸軟或赤或白或痒或痛後或  
如無皮或如皴裂日晡至夜脹痛焮熱此足三陰虧損  
用加減八味丸及逍遙散加熟地川芎百餘劑而愈

脚發男婦同治

脚發之症屬足三陰經精血虧損或足三陽經濕熱下

注若色赤腫痛而潰膿者屬濕熱下注為可治若色微赤微腫而膿清者屬精血虧損為難治若黑黯不腫痛不潰膿煩熱作渴小便淋漓者陰敗未傳惡症也為不治其法濕熱下注者先用隔蒜灸活命飲以解壅毒次服益氣湯六味丸以補精氣若色黯不痛者着肉灸桑枝灸以行壅滯助陽氣更用十全大補湯八味丸壯脾胃滋化源多有復生者若專治其瘡復傷生氣吾未見其生者

治驗

閣老靳介菴脚指縫作痒出水腫焮脚面敷止痒之藥不應服除濕之劑益甚余以為陰虛濕熱下注用六味地黄丸補中益氣湯而愈

大叅李北溪左足赤腫作痛此足三陽經濕熱下注先用隔蒜灸活命飲一劑其痛頓止灸患處出水赤腫頓消次用托裏消毒散四劑灸患處出膿而愈

儒者楊舉元患此微腫痛微赤焮此足三陰經陰虛濕

熱下注用隔蒜灸托裏散而起發用十全大補湯而膿成又與加減八味丸料百劑而斂

一儒者患此瘡硬色白兩月餘矣此足三陰經虧損為外寒所侵用大防風湯及十全大補兼服而消後場屋不利飲食勞倦前症復作盜汗內熱飲食不化便滑肌瘦此脾土虛寒而命門火不能相生用八味丸益氣湯百餘劑喜其年壯得愈

一男子脚心發熱作渴引飲或用四物苓連栢知母之

類腹痛作嘔煩熱大渴此足三陰虧損前藥復傷脾胃也先用六君加炮薑數劑而脾胃醒再用補中益氣加茯苓半夏而脾胃健乃以加減八味丸兼服半載而愈一儒者脚心發熱作痒以滾湯浸漬潰而出水肌體骨立作渴吐痰此脾腎虛而水泛為痰也服益氣湯六味丸年餘元氣復而諸症愈

少宗伯顧東江面黧作渴余曰此腎經虧損當滋化源以杜後患彼雖然之而終不服次年九月內左足面患

疽色黯不痛脚腿沉重用隔蒜灸三十餘壯足腿即輕  
瘡出血水數日而消瘡色仍黯時公將北行賀萬壽余  
診之曰脾脉衰憊陽氣虛極不宜遠行公曰余得夢屢  
驗向夢羣仙待我此壽徵也至河間驛聚仙堂病篤嘆  
曰立齋豈能留我果卒於此亦異數也

脫疽

脫疽謂疔患於足或足指重者潰脫故名之亦有患於  
手患於指者因醇酒炙燂膏梁傷脾或房勞損腎故有

先渴而後患者有先患而後渴者若色赤作痛自潰者可治色黑不潰者不治色赤作痛者元氣虛而濕毒壅盛也先用隔蒜灸活命飲托裏散再用十全大補湯加減八味丸色黯不痛者腎氣敗而虛火盛也隔蒜灸桑枝灸亦用十全大補湯加減八味丸則毒氣不致上侵元氣不致虧損庶可保生亦有因修手足口咬等傷而致者若元氣虛弱或犯房事外塗寒涼內服尅伐損傷脾胃患處不潰若黑黯上延亦多致死重者須當以脚



刀轉解周髀輕洩去之則筋隨骨出而毒得泄亦不痛  
否則毒筋內斷雖去而仍潰且偏僻之處氣血罕到藥  
難導達况攻毒之劑先傷脾胃不若灸法為良重者須  
解去為善故孫真人云在肉則割在指則截蓋親之遺  
體雖不忍傷而遂至夭歿則尤傷矣况解法無痛患者  
知之

治驗

一男子足指患之腫焮痛赤此三陽經虛而外邪所乘

也用隔蒜灸人參敗毒散加銀花白芷大黃二劑而痛甚又二劑痛止又與十宣散加天花粉金銀花去桂數劑而愈又有足指患之者色紫不痛此三陽經熱毒壅滯隔蒜灸五十餘壯又明灸百壯始痛投活命飲四劑更以托裏藥潰脫而愈

一男子患前症赤痛作渴此足三陰虛而火內動用隔蒜灸活命飲三劑而潰更服托裏藥及加減八味丸潰脫而愈若早用前法不至於此

一男子腫痛色赤發熱作渴大小便秘結其脉浮數按之沉實此足三陽經積熱內外俱受患也先用隔蒜灸及人參敗毒散加銀花白芷大黃而潰更以活命飲而痊

一膏粱之人先作渴足熱後足大指赤痛六脉洪數而無力左尺為甚余為此足三陰虛當滋化源為主固服除濕敗毒等劑元氣益虛色黯延足余乃朝用補中益氣湯夕用補陰八珍湯各三十餘劑及桑枝灸潰而膿

清作渴不止遂朝以前湯送加減八味丸夕用十全大補湯三十餘劑而痊是時同患此症服敗毒之藥者俱不救

瘤贅

附結核凡結核當與瘰癧叅看

內經云肝統筋而藏血心統血而主脉脾主肉而統血肺主氣而司腠理腎統骨而主水若怒動肝火血涸而筋攣者其自筋腫起按之如筋久而或有赤縷名曰筋瘤用六味地黃丸四物山梔木瓜之類若勞役火動陰

血沸騰外邪所搏而為瘡者其自肌肉瘡起久而有赤  
縷或皮俱赤名曰血瘤用四物茯苓遠志之類若鬱結  
傷脾肌肉消薄外邪所搏而為瘡者其自肌肉瘡起按  
之實軟名曰肉瘤用歸脾益氣二湯若勞傷肺氣痿理  
不密外邪所搏而壅瘡者其自皮膚瘡起按之浮軟名  
曰氣瘤用補中益氣湯之類若勞傷腎水不能榮骨而  
為腫者其自骨瘡起按之堅硬名曰骨瘤用地黃丸及  
補中益氣湯主之夫瘤者留也隨氣凝滯皆因臟腑受

傷氣血乖違當求其屬而治其本大凡屬肝膽二經結核八珍加山梔膽草以養氣血清肝火六味丸以養肺金生腎水若屬肝火血燥須生血涼血用四物二地丹皮酒炒黑膽草山梔中氣虛者補中益氣兼服若治失其法脾胃虧損營氣虛弱不能濡於患處或寒氣凝於瘡口榮氣不能滋養於患處以致久不生肌而成漏者悉調補脾胃則氣血壯而肌肉自生矣若不慎飲食起居及七情六淫或用寒涼蝕藥蛛絲纏羌花線等法以

治其外則誤矣

治驗

長洲庠王天爵辛丑春左腿近環跳患之狀如大桃按之濡軟略服除濕流氣化痰之劑惡寒發熱食少體倦形氣俱虛脉洪大而虛氣瘤也肺主之蓋膽屬木肺屬金然發於膽經部分乃肺金侮肝木元氣虧損而其膿已內潰矣遂用十全大補湯數劑出青白稀膿甚多頓加寒熱煩渴頭痛殊類傷寒狀余謂此因膿泄而血氣

益虛耳仍用前湯其勢益甚脉洪數大按之如無乃加  
附子一錢其勢愈甚而脉復如前此虛甚而藥未能及  
也更加附子二錢三劑諸症頓退乃朝用補中益氣湯  
夕用十全大補湯各三十餘劑出腐骨五塊瘡口將完  
後因不慎起居患處復潰諸症更發咽間如焚口舌無  
皮用十全大補加附子一錢服之諸症即愈二日不服  
內病悉至患處復潰二年後又患服前藥不應診其尺  
脉微細如絲此屬命門火衰用八味丸為主佐以十全



大補湯稍愈至乙巳仍患虛寒之症而歿

一男子左腿外側近臀腫一塊上有赤縷三年矣飲食起居如常觸破湧出血膿發熱惡寒此膽經受症故發於腿外側診其脉左尺洪數左關弦洪此腎水不能生肝木用補中益氣湯六味地黄丸而痊

一男子小腹患之膿水淋漓此足三陰之症用補中益氣加麥門五味以培脾土用六味地黄丸以生腎水更用蘆薈丸以清肝火而斂

一老儒眉間患之二年其狀如紫桃下墜蓋目按之如水囊此肝脾之症膿瘀內潰而然耳遂刺出血膿目即開以炒黑膽草山梔芎歸芎藥柴胡白朮茯苓等類而愈

舉人江節夫兩耳下兩臂兩肋結核略服祛痰降火軟堅之劑益甚余曰此膽經血虛火燥也蓋膽經行人身之側前藥必致虧損至明年七月復請視各核皆潰脉浮大而瀉時金旺於秋木受金剋必不治果卒

嘉善周上舍兩耳下項間筋攣壅腫堅硬咳嗽氣喘內  
熱盜汗所服皆化痰散堅行氣之劑勢益甚予診之左  
關弦澀左尺洪數此怒氣傷肝房勞損腎須滋腎水生  
肝血慎調攝至水旺之際庶可愈矣彼欲速效乃外敷  
商陸石灰等藥內服海藻蓬朮之類至秋金旺之際元  
氣愈虛其腫愈甚而歿

鎮江孫上舍缺盆間腫如覆甌堅硬色赤內熱晡熱自  
汗盜汗就治於余曰賤疾皆以散堅行氣降火破血之

劑欲其內消而反甚其脉左尺洪數按之而弱左關洪數按之而澀此怒氣傷肝血涸而筋攣也因其急於仕進余辭不能治彼亦不信後果殁此症若補脾肺滋肝腎則木得水而敷華筋得血而滋潤多有得生者

### 疝

疝屬肝膽少陽經風熱血燥或怒動肝火或肝客淫氣所致蓋肝熱水涸腎氣不榮故精亡而筋攣也宜以地黃丸滋腎水以生肝血為善若用蛛絲纏螳螂蝕著艾

灸必多致誤大抵此症與血燥結核相同故外用腐蝕等法內服燥血消毒則精血愈虛肝筋受傷瘡口翻突開張卒成敗症

治驗

府庠朱宏仁年二十右手背近中指患五疔中一大者如黃苴餘皆如聚黍拔之如絲長三四寸許此血燥筋縮用清肝益榮湯五十餘劑而愈

府庠沈嫗文幼嚙指甲及長不能自禁余曰此肝火血

燥也又頸側常生小疣子屢散屢發又臂生一塊如菜  
豆大若觸碎如斷束縷扯之則長縱之則縮後兩鬢發  
白點求治余曰子素肝病此部亦屬肝膽經也夫爪為  
筋之餘膽行人身之側此與嚙爪生疥等症相應須滋  
補腎水以生肝膽則諸病自愈矣乃與六味地黃丸服  
之二年白點自退疣亦不生

一男子臉患疣初如赤椹雜用敷貼之藥翻張如菌又  
用腐蝕焮大如瘤此足三陰經虛症悉具治以補脾肺

生肝腎等劑而尋愈

一男子小腹中一塊不時攻痛或用行氣化痰等藥不應尤以為血鼈服行氣逐血之劑後手背結一痲子漸長寸許形如鼈狀肢節間如豈大者甚多彼泥鼈生子發於外亦用行血虛症悉至左尺洪數關脉洪數弦余以為腎水不能生肝木以致肝火血燥而筋攣用六味地黃丸生腎水滋肝血三月餘諸症悉愈

一男子因勞役過度面色青黑發熱咳嗽面生疔子腹

內一塊攻上攻下作痛口乾小便澀服消尅之藥愈甚察其脉左右關俱弦洪元氣弱甚此肝脾受病而筋攣也投以加味道遙散合地黃丸料元氣遂復若誤以為血壅之類消之必致不起

一男子素膏粱醇酒先便血便結驚悸少寐後肛門周生小顆如疣子如鼠乳大小不一用清熱敗毒等藥半載之間腿內股亦然又用化痰之藥內熱吐痰頸間俱作肝腎脉浮數按之而弱余以為足三陰經血虛火熾



法當滋化源彼不信別服四物黃柏知母之類諸症蜂起此胃氣復傷各經俱病也先用補中益氣湯三十餘劑諸症漸愈乃朝用前湯夕用八珍湯又各五十餘劑諸症尋愈於是夕改用六味丸加五味子又半載諸症悉愈

一婦人左手背并次指患五六枚如熟椹內熱晡熱月經素不及期余曰此因肝脾血虛而有熱也當調補二經使陰血生而諸症自愈不信乃用艾灸手腫脹發熱

手指皆攣兩脇項及胸乳間皆患疣經行無期余用加味道遙散少加炒黑黃連數劑漸愈乃去黃連更佐以歸脾湯各患漸愈又百餘劑經行如期再用地黃丸三料而痊

一婦人小腹內一塊或時上攻或時下墜寒熱胸痞小便淋漓或用行氣化痰等劑前症愈甚月經兩月餘而一行或以為內有肉鼈啖飲其血而經不行服驅逐之劑下血甚多兩手背結一疣如大豆許兩月漸長寸許

又兩月餘又患數枚疑以鼈子行於外仍行驅逐兩耳  
下各患瘡又疑為瘡毒余曰此屬肝火血燥也用加味  
逍遙加味歸脾二藥兼服佐以六味丸三月餘而愈  
一婦人患之用蛛絲纏羌花線螳螂啖毒藥蝕着艾灸  
大潰腫痛發熱出血余曰此陰血虛也不信仍服降火  
之藥而歿

發瘰 瘰當作瘰

瘡瘍發瘰因氣血虧損外邪所搏或內虛鬱火所致其

形牙關緊急四肢勁強或腰背反張肢體抽搐其有汗而不惡寒者曰柔痙風能散氣故有汗也其無汗而惡寒者曰剛痙寒能滯血故無汗也皆由亡血過多筋無所養故傷寒汗下過多與潰瘍產後多患之乃敗症也若大補氣血多有復生者若作風治速其危矣

### 治驗

秋官張同野舊有流注因暴寒睡炕口目抽搐手足戰掉余以為氣血虛熱而然用參芪歸朮川芎山梔柴胡

半夏天麻灸草治之而愈

吳給事瞻之墜馬傷首出血過多發熱煩躁肉瞤筋惕  
或作破傷風欲發汗祛風余曰此亡血火動也無風可  
祛無汗可發當峻補其血用聖愈湯二劑頓愈又用健  
脾胃養氣血而全愈

一儒者背瘡將愈發熱煩躁自用降火之劑項強口噤  
自汗惡寒此汗多內亡津血筋無所榮也用補氣血之  
劑及地黃丸而愈

一男子素勤苦早行遍身發疙瘩口噤目直脉弦緊此勞傷氣血內熱外邪所搏也用補中益氣加山梔羌活川芎而瘥半載後遍身作痒搔破成瘡發熱作渴脉洪大而虛復以前湯加芎藥麥門熟地天麻而愈

一儒者善怒患瘰癧復因大怒跳躍忽仆地兩臂抽搐唇口喎斜左目緊小此肝火血虛內熱生風用八珍散加牡丹皮鈎藤山梔而愈次年春前病復作無小便自遺左關弦洪而數余以為肝火血燥用六味丸加鈎藤

五味麥門芎歸治之漸愈又用補中益氣加山梔鈎藤  
牡丹皮而安

一癰婦因怒仆地瘡口出血語言蹇澀口眼喎斜四肢  
拘急汗出遺尿或用驅風之劑六脉洪大肝脉尤甚此  
肝火熾甚也用加味道遙散加鈎藤及六味丸尋愈

一婦人患內痔因勞出血甚多不時發瘕飲食少思形  
體倦怠其面色白余謂此氣傷而不能統血也用補中  
益氣湯加寒熱出血此陽氣虛寒也仍以前湯加炮薑

四劑寒熱漸止飲食漸進又四劑而血頓止後因勞役  
或怒氣即便血或發瘕投以補中益氣湯加鈎藤而愈  
一婦人素性急患遍身搔痒或項間結核常服搜風順  
氣之劑後大怒吐血唇口牽緊小便頻數或時自遺此  
怒動肝火而血妄行也用小柴胡湯加山梔牡丹皮而  
愈

一癰婦因勞兼怒四肢攣屈煩痛自汗小便短少畏見  
風寒脉浮弦緩此氣血虛而風寒濕熱相搏也先用東



垣清燥湯漸愈再用加味逍遙散及八珍湯加牡丹皮而痊

一婦人素有肝火兩物間或腫痛或寒熱忽然昏潰瘕癥抽搐善伸數欠四肢筋攣痰涎上升此肺金燥甚而血液衰少也用清燥丸六味丸兼服尋愈

一婦人因大勞患腫瘡發疔瘡搔碎成瘡日晡熱甚或口噤發搐或頭目眩暈此肝脾氣血虛而內熱以八珍散加柴胡山梔治之諸症少愈復因怒前症復作經行

不止此肝脾血熱用加味道遙散漸愈又用八珍散加  
柴胡山梔而痊

一婦人發疔瘡日晡熱甚月經先期或頭目昏眩或寒  
熱發熱或四肢抽搐此肝經風熱血燥用加味道遙散  
治之尋愈後因怒前症復作口噤遺尿此火炎血燥也  
用加味小柴胡湯治之漸愈又夜間發熱譫語此血分  
有熱也用小柴胡湯加生地而愈更用加味道遙散調  
理而安

一婦人患爾唇月經先期余以為肝火血熱不信乃汎用降火之劑反致月經過期復因勞怒口噤呻吟肢體不隨六脉洪大面目赤色用八珍麥門五味山梔丹皮數劑漸愈兼用逍遙散六味九料各三十餘劑全愈

一婦人經行遇怒其經即止甚則口噤筋攣鼻衄頭痛痰湧搐搦腫子上視此肝火熾甚以小柴胡湯加熟地黃山梔鈎藤鈎而愈

一婦人素陰虛患遍身搔痒誤服祛風之藥口噤抽搐

肝脉洪數余曰肝血為陰為水肝氣為陽為火此乃肝  
經血虛火盛耳宜助陰血抑肝火遂用四物麥門五味  
柴胡山梔生草熟菗頓止又以八珍加黃芪麥門五味  
鈎藤炙草調理而愈

一婦人久患流注脾胃虛弱忽痰壅氣喘頭搖目劓手  
揚足擲難以候脉視其面黃中見青此肝木乘脾土也  
用六君加柴胡升麻治之而甦更以補中益氣加半夏  
茯苓而安

類破傷風症

大凡癰疽潰後筋糜肉爛膿血大泄陽隨陰散或筋脉拘急惡寒惕擗甚者舌強口噤項背反張痰涎壅甚便閉汗出不時發熱此氣血俱虛而傳變雖與破傷風相類而主治之法當大補氣血若果係風症亦須以大補氣血為本而兼以治風之藥設若不審是非而妄藥之則誤矣風症治見後方

治驗

司徒邊華泉肩患癱潰而發熱目直或睵珠類中風日  
晡熱甚脉益數此足三陰氣血虧血虛火妄動用參芪  
歸朮炙草加酒炒黑黃栢五味麥門肉桂四劑而愈又  
數劑而斂

陸大行背瘡內潰出膿二碗許用托裏之劑痛止瘡消  
停藥忽寒熱作渴頭痛自汗此元氣虛而未能復也用  
十全大補加麥門五味肉桂二劑益甚診其脉如故此  
藥力未及仍用前藥加附子一錢三劑諸症悉愈乃去

附子加肉桂數劑而斂

一儒者患腿癱深蓄於內肉色不變久不穿潰針出膿  
痰五碗許惡症駢臻全類中風此脾胃虛而變症也用  
四君子加當歸炮薑及聖愈湯各四劑而安又勞心不  
寐用歸脾湯而愈

一儒者傷寒後患流注腫痛潮熱用十宣敗毒等劑出  
稀膿五六碗許發熱惡寒煩躁作嘔殊類破傷風症而  
歿

一男子背瘡未痊乃以膏藥剪孔貼之患破傷風症而  
歿此先失於內補外邪襲其虛耳余見此症貼膏藥剪  
孔欲其通氣而反患破傷風搽斂藥生肌欲其收口而  
反助其餘毒以致歿者多矣

論瘡瘍隨症加減用藥

內經云形傷痛氣傷腫先腫而後痛者形傷氣也先痛  
而後腫者氣傷形也東垣先生謂胃為五臟之本源人  
身之根蒂丹溪先生云癰疽因積毒在臟腑宜先助胃



壯氣以固其本夫然則氣血凝結者自散膿瘕已成者  
自潰肌肉欲死者自生肌肉已死者自腐死肉已潰者  
自斂若獨攻其瘡脾胃氣虛七惡蜂起其不死者幸矣  
故凡前症須用托裡消毒散為主若高腫焮痛熱毒也  
加黃連漫腫微痛氣虛也去金銀花連翹二味加參朮  
頭痛發熱邪在表也本方加川芎羌活若外邪在表而  
元氣實者暫用人參敗毒散頭痛惡寒表虛也去五味  
加參芪發熱飲冷便秘內熱也去參芪歸朮加大黃發

熱飲熱便秘內虛也去二味加參芪歸朮寒熱飲冷小  
便瀉滯肝熱也去參芪加柴胡山梔不作膿膿不潰氣  
虛也去二味及白芷加參朮肉桂如不應暫用十全大  
補湯腫赤作痛血凝滯也本方加乳香沒藥如不應暫  
用仙方活命飲膿出反痛氣血虛也去三味即銀花連  
翹白芷後放此加參芪歸地肉赤而不斂血虛而有熱  
也去三味加熟地牡丹皮肉黯而不斂陽氣虛寒也去  
三味加參芪白薇官桂漫腫不痛或肉死不潰脾氣虛

也去三味加人參白朮如不應加薑桂更不應急加附  
子肉白而不斂陽氣虛也去三味加參芪歸朮朮多而  
不斂氣血虛也去三味加參芪歸朮熟地如不應暫用  
十全大補湯飲食少思而不斂胃氣虛也去三味加參  
芪如不應暫用補中益氣湯飲食難化而不斂脾氣虛  
也去三味加參朮如不應暫用六君子湯又不應佐以  
八味九膿多而帶赤血虛也去三味加歸地參朮如不  
應暫用八珍湯加牡丹皮忿怒晡熱而出血肝火血虛

也去三味加牡丹皮熟地炒黑山梔如不應暫用八珍  
湯送六味丸面青脇脹而出血肝氣虛而不能藏血也  
去三味加山茱山藥五味子如不應魚六味丸食少體  
倦而出血脾氣虛而不能攝血也去三味加參芪歸地  
兼鬱結少寐更加遠志酸棗仁茯神龍眼肉如不應暫  
用歸脾湯欲嘔作嘔或外搽內服寒涼或痛甚或感寒  
邪穢氣而嘔胃氣虛也去三味加藿香參朮飲食少思  
腸鳴腹痛腹冷泄瀉脾氣虛寒也去三味加炮薑木香

手足逆冷脾血虛寒也更加附子煎送四神丸飲冷作  
渴熱毒也加赤小豆知母如不應暫用竹葉黃芪湯善  
食作渴胃火也加石膏山梔如不應暫用竹葉石膏湯  
膿多而作渴氣血虛也去三味加熟地黃五味子如不  
應暫用十全大補湯加五味子麥門冬口乾舌燥腎氣  
虛也去三味加熟地山茱山藥如不應兼六味丸又不  
應佐以補中益氣湯自汗內熱口乾胃氣虛也去三味  
加參芪歸朮如不應暫用六君子湯盜汗內熱口乾陰

血虛也去三味加熟地麥門五味如不應暫用當歸六黃湯莖中痛而小便不利精內敗也去三味加山茱山藥澤瀉如不應佐以六味丸愈便則愈痛愈痛則愈便精復竭也去三味煎送六味丸食少體倦口乾飲熱小便黃短脾肺虛熱也去三味加五味子山茱萸如不應暫用六味丸勞役而小便黃元氣下陷也去三味加升麻柴胡午後而小便黃短腎虛熱也去三味加升麻柴胡如不應煎送六味丸口燥作渴小便頻數腎水虧也

去三味加五味山茱山藥熟地如不應兼用六味丸四  
肢逆冷腎氣虛寒也去三味加桂附如不應佐以八味  
丸食少體倦作渴胃氣虛也去三味加參芪白朮如不  
應暫用補中益氣湯體倦頭痛或眩暈中氣虛也去三  
味加柴胡升麻如不應暫用補中益氣湯加蔓荊子日  
晡頭痛或眩暈陰血虛也去三味加熟地黃如不應佐  
以六味丸夢泄遺精頭暈頭痛或痰喘氣促腎虛不能  
納氣也去三味并川芎佐以六味丸如不應是虛寒也

用八味丸面目赤色煩熱作渴脉大而虛血脫發躁也  
去三味加黃芪當歸如不應暫用當歸補血湯身熱惡  
衣欲投於水脉沉微細氣脫發躁也去三味加肉桂附  
子如不應暫用附子理中湯善思體痛無寐盜汗脾血  
虛也去三味加茯苓遠志酸棗仁圓眼肉如不應暫用  
歸脾湯寢寐而汗出腎氣虛也去三味加五味子煎送  
六味丸飲食而出汗胃氣虛也去三味加參芪歸朮五  
味子如不應暫用六君子湯睡覺飽而出盜汗宿食也



去三味加參朮半夏如不應暫用六君子湯胸滿多痰  
脾氣虛也去三味加桔梗半夏如不應暫用六君子湯  
加桔梗枳殼晡熱多痰脾血虛也去三味加歸地參朮  
如不應暫用六君子湯加芎歸熟地咳嗽唾痰腎虧津  
液泛上也去三味加山茱山藥熟地如不應佐以六味  
丸忿怒胸痞肝氣滯也去三味加桔梗山梔如不應暫  
用補中益氣湯加桔梗枳殼倦怠胸痞中氣虛也去三  
味加參朮茯苓如不應暫用八珍湯加柴胡口苦寒熱

往來肝火血虛也去三味加柴胡熟地因怒寒熱往來  
肝火血虛也加柴胡黃芩如不應暫用八珍湯加炒山  
梔炒酸棗仁酒炒黑膽草體倦寒熱往來肝脾氣滯也  
去三味加參芪歸木如不應暫用補中益氣湯內熟朮  
熱或寒熱往來陰血虛也去三味加芎歸牡丹皮柴胡  
如不應暫用八珍湯加牡丹皮畏寒或寒熱往來胃氣  
虛也去三味加參苓白朮升麻如不應暫用補中益氣  
湯脇痛痞滿或寒熱往來肝氣滯也去三味加青皮木

香如不應屬氣血虛也更加芎歸參朮若婦人勞役恚怒或適經行發熱譫語或夜間熱甚在血分也去三味加生地丹皮柴胡如不應暫用加味四物湯若誤尅伐或膿血大泄或因吐瀉或誤而入房或勞損元氣或夢泄遺精或外邪乘入以致發熱頭痛小便淋瀝或滑數便血目赤煩喘氣短頭暈體倦熱渴意欲投水身熱惡衣揚手擲足腰背反張鄭聲自汗此陽氣脫陷之假熱症也若畏寒頭痛咳逆嘔吐耳曠目矇小便自遺瀉利

腸鳴裡急腹痛玉莖短縮齒浮痛肢體麻痺或厥冷身  
痛或咬舌噤唇此陽氣脫陷之真寒症也凡此危候勿  
論其脉勿問其症但見有其一二亦去三味急加桂附  
補之庶有復生之理大抵用藥之法當分元氣虛實標  
本緩急若病急而元氣實者先治其標病緩而元氣虛  
者先治其本若病急而元氣又虛者當治其本為主而  
兼以治標東垣先生云形氣有餘病氣有餘當瀉不當  
補形氣不足病氣不足當補不當瀉丹溪先生云但見

腫痛叅之脉症虛弱便與滋補氣血無虧可保終吉治者審焉



薛氏醫案卷十五